

ርኢሰ ኢሲያሰ አፈወርቂ ምስል ልኡክ ጃፓን ለሀድግ

ርኢሰ ኢሲያሰ አፈወርቂ፡ እብ ወዚር ደውለት እት ወዛረት ኻርጅየት ሚስተር ማሳሂሳ ሳቶ ለትመረሐ ልኡክ ጃፓን፤ እት የም ሰሰ እት ቃዐት ደንደን እንዴ ትከብተ ሀድግ ምስሉ።

እተ ሀድግ ወዚር ሳቶ፡ እት የም 9 ዩልዮ እት ፍንጌ ኤረትሮፕ ወኡቡቡ ለትፈረመ “ናይ ሕብር አዋጅ ሰላም ወምሰንዮት” ተዩድ ሕክመት ጃፓን ሸርሐ።

ልኡክ ሕክመት ጃፓን እምበል እሴ፡ እብ ክሰብ እት ሰነት 2019 እት የነሃማ ጃፓን ለጉብኢ ሳብዓይ ‘እድንያይ ወዕላ ተክዮ እግል ዐቦት አፍሪቀ በህለት ‘TICAD’ ተውዴሕ ሐቀለ ሀቡ እግል ርኢሰ ኢሲያሰ አፈወርቂ ዐዘመት መሻረኩት ቀደመ እቲ።

ለልኡክ እብ ተውሳኹ ጃፓን ዕዱ ቁር ሳብት መጅልስ አምን እግል ትግበእ እተ ትወድዮ ህሌት ጅህድ ሰዳይት ሕክመት ኤረትሮፕ ጠልቡ።

ርኢሰ ኢሲያሰ አፈወርቂ ህቡ፡ እብ ክሰብ ዐመልየት ሰላም ዕራት ኤረትሮፕ ወኡቡቡ እብ ዓመት፤ እት አሰመረ ለትፈረመ “ናይ ሕብር


አዋጅ ሰላም ወምሰንዮት” እቲ ለመጻ ተጠወር ተውዴሕ ሐቀለ ሀቡ እግል ዝያድ ፍገራት መጅልስ አምን እት ሸክል ወቀድየት ዕድወዮቲ አሳሲያይ አትሒያሰ እግል ሊዴ ልትቀደም ለህለ ሊክ ኤረትሮፕ ክም ተአይዱ ወደሐ።

እሊ ክእነ ዲብ እንቲ፤ ርኢሰ ኢሲያሰ አፍወርቂ እብ ርኢሰ ወላየት(ክልል) ኦሮምዮ አሲይድ ለመ መገርሰ ወወዚር ኻርጅየት ወርቅኔህ ገበዬሁ ለትከወነ ወቁል ልኡክ ሕክመት ፈደራልየት ጅምሁርየት ኢትዮጵያ እንዴ ትራከብ ሀድግ ምስሉም።

እሊ እት የም ሰሰ ኦገስት እት አሰመረ ለገእ ሀድግ፤ እት ፈዓልየት “ናይ ሕብር አዋጅ ሰላም ወምሰንዮት ኤርትሮፕ ወኡቡቡ” ለረከብ ቲ ለዐለ።

ርኢሰ ኢሲያሰ ወወቁል ልኡክ ሕክመት ኢትዮጵያ እብ ተውሳኹ እብ ኻሰብ እት መንጠቀት ቀር አፍሪቀ ለህለ ተጠወራት ሀድገው።

ሀደፍ ዝያረት ወቁል ልኡክ ሕክመት ኢትዮጵያ፡ ምስል ሚርሐት ጅብህት ተሕሪር ኦሮሞ እግል ልህደግ ቲ።



ሀድግ ዕሬ ሕክመት ኢትዮጵያ ወጀብህት ተሕሪር ኦሮሞ እት አሰመረ ጉብእ

ሕክመት ፈደራልየት ደመቅራዋየት ጅምሁርየት ኢትዮጵያ ወጀብህት ተሕሪር ኦሮሞ፡ 07 ኦገስት 2018 እት አሰመረ ሀድግ ዕሬ ወደው።

እግለ ሀድግ፡ እብ ጀህት ሕክመት ኢትዮጵያ ርኢሰ ወላየት ኦሮምያ አሲይድ ለመ መገርሰ፡ እብጀህት ጀብህት ተሕሪር ኦሮሞ ህቡ ርኢሰለ መንዘመት አሲይድ ዳወድ እብሳ ቶም ለወደዱ።

እተ መናሰበት፡ ወዚር

ኻርጅየት አቶብዩ ዶ/ር ወርቅኔህ ገበዬሁ ሓድር ዐለ።

ክልኢቶም ለጀህት ሐቀለ ሀድግ እተ አፍገረዉ ናይ ሕብር ሸራሕ፡ እት ቀድየት ኦሮሞ ወኡርምዮ፤ ክምስልሁመ እት ቀድየት ኢትዮጵያ እብ ዓመት እብ ሕብር እግል ልሸቀው ትፋህመው።

እብ አሳሰለ ትበጸሐት መፋህመት፡ እግል ሰኒን ብዙሕ እት ፍንጌ ሕክመት ኢትዮጵያ ወጀብህት ተሕሪር

ኦሮሞ ለዐለ ሐርብ እንዴ አክተመ፡ ጀብህት ተሕሪር ኦሮሞ እት ቀድየት ኢትዮጵያ እብ ገበይ ሰላም ንዳለ እግል ቲዴ ቲ።

ወካይል ሕክመት ፈደራልየት ደመቅራዋየት ጅምሁርየት ኢትዮጵያ ወጀብህት ተሕሪር ኦሮሞ እት ደንጎብ፡ ለእቲ አተፈቀው ንቃዋ እት ፍዕል እግል ልውዐል ወለ ታርፍ ህለ ለተአትራቴዕ ልጅነት እግል ትትአሰስ ትፋህመው።

መህረጃን ኤረትሮፕን ሰካን ከነደ እብ ሰርገል ተምም



ኤርትራዩን ሰካን ምፍጋር ጸሓይ ከነደ 18ይ ናይ ሓል መህረጃኖም፡ “ናጸየት እብ ክድመት” እት ሐንቲለ ትብል ሰቅራት፤ ምን የም 04 አሰክ 06 ኦገስት እት መዲነት ቶሮንቶ እብ ገበይ ናይረት ሰርገለው።


ናይ የም ዓመት መህረጃን፡ ሰሚናራት ወሀድግ እት ሓድር ተጠወር ወዶር ናይለ እት ኻርጅ ለንብር መዋዋኒን እት ብናእ ወጠን፤ ክምስልሁመ በራምጅ ርያደት ወዳዳት ለሸምል ክምስለ ዐለ፤ ምነ ኦካን ለበጽሐተነ ሐብሬ ተአፍህም።

መስኡል ሸኡን ቁንሰልየት እት ከነደ አሲይድ አሕመድ ኢማን እተ ወደዩ ሰሚናር፡ ተጠወራት መንጠቀትን እብ ዓመት፤ ሓድር ተዩልል ወጠን ህቡ እብ ፍንቲይ ለሽሰስ ተውዴሕ ክም ሀቡ።


እትሊ ሐቆ እት ፍንጌ ኤርትሮፕ ወኡቡቡ ለትፈረመ አዋጅ ሰላም ወምሰንዮት ትትርኤ ለህሌት ሰጸየት ለተህይብ መርሐሉት፤ ሕሉል አሳሲ ለለክመጽእ ተጠወር እግል ልትአከድ ዝያድ ሸቁል ክም ለአትሐዜ አፍህመ።

መቐተርኩት እተ ሀበዉ ረአይ፡ መህረጃን ሀዊዮቶም ወዳዳቶም እቲ እንዴ ሓፈዘው አተላላይ ሕሸመቶም ለለክክዶ እቲ መሁም ወጠንያይ መናሰበት ክምቲ እት ሸርሐ፡ ወጠን ዋወር እግል ብንዮት እተ ጉብእ ህለ ጅህድ መስኡልየቶም እግል ልርፈዮ መዳሊቶም አከደው።

እሊ እግል ሰለስ አምዕል ለአተላለ መህረጃን ኤርትራዩን ምፍጋር ጸሓይ ከነደ፡ እት ከነደ ለንብር ወምን ኤረትሮፕ ለመጽው ሰብ-ወራት ፈን ናይር ዐለ።



ዝያረት ልኡክ ኤሪትሮፕ እት ሰውድየ



እብ ወዚር ኻርጅየት አሰይድ ዑስማን ሳልሕ ወጌምያይ ርኢስ አሰይድ የማኔ ገብረኣብ ለትአሰሰ ውቁል ወፍድ ሕኩመት ኤሪትሮፕ፡ የም 5 ኣገሰት ዲብ ጅደ ምሰል ወዚር ካርጅየት ሰውድየ ዓድል አልጁቤሪ፡ እንዲ ኣምሐበሪ፡ ዲብ ኣደቀቦት ዕላቀት እብ ዓመት፡ ትጃረት ወክሰኣት ረኣሰ-ማል እብ ፍንቲት ሀድገ።

እትሊ ልቃእ፡ ክልኢቶም ለጅሃት ዲብ ሓድር ተጠውራት ቀር ኣፍሪቀ ኣግደ ህይ ወቀይ ሰላም ኤሪትሮፕ ወኢትዮጵየ ኣፍካር እተ ትባደለው እተ ኢነት፡ ወዚር ዓድል አልጁቤሪ፡ - ዐዱ እሊ እግል ልትደቀብ ዶረ እግል ትቀድም ዱሊት ክምተ ኣከደ።

ዝያረት ርኢስ ፈደራልያይት

ጀምሁርየት ሶማል መሐመድ ዑብዱላሂ ዲብ ኤሪትሮፕ እብ ክሰሰ ዲብ ወደወ መፋህመት፡ እሊ ዲብ መንጠቀት ቀር ኣፍሪቀ ልትርኤ ለህለ ተጠውራት ሓዲስ ጀምሁርየት ሶማልየ ተሐድያተ እግል ትትዐዴ ክም ሰድየ ዳምናም ክምቶም ሸርሐው።

እተ መናሰበት፡ ወዚር ዑስማን እግል ወዚር ዓድል፡ ዲብ ኤሪትሮፕ ዝያረት እግል ሊዴ ለቀደመየ እቱ ዐዙመት ወዚር ዓድል ትከበተየ።

ዝያረት ውቁል ወፍድ ሕኩመት ኤሪትሮፕ ዲብ ሰውድየ፡ ኣተላላይ ናይለ ርኢስ ኢሰያስ ኣፍወርቂ ቀደም ክልኤ ሳምን ዲብ ዐድ ለወደየ ናይ ሸቅል ዝያረት ተ።

ከርቱም፡ ኤሪትሮፕን ወኣቶብዩን ተእዩዶም እግል ሰላም ሸርሐ

ኤሪትሮፕን ወኣቶብዩን ሰካን ኸርቱም ወድዋረ-ሱዳን፡ እግል እት ፍንጌ ኤሪትሮፕ ወኢትዮጵየ ሰላም እንዴ ትመደደት ወእግል ናይ ሕበር ሸራክት ወዐቦት መንገኣት ለትከሰት፡ እት የም 9 ዩልዩ እት ኣሰመረ ለትፈረመት “እትፋቅየት ሰላም ወመሰንዮት ለዐምቱ ተእዩድ፡ እብ ናይር ኣሴራር ሸርሐው።

ለእት የም 3 ኣገሰት ለገኣ ኣሴራር፡ እብ ጃልያት ኤርትሮፕ ወኢትዮጵየ ለትዝመ እት ገብእ፡ ኣላፍ መዋዋኒን ክልኢትን ለድወል፡ ሰቅራታት እት ለኣሰመየ ወመንዴራት እንዴ ረፍዐው፡ እግል ርኢስ ኢሰያስ ኣፍወርቂ ወርኢስ ውዘረእ ኣቢ ኣሕመድ እተ ወደወ ተእሪካይ ህድግ ለትበጸሐት እትፋቅየት እግል ትሰርገል ደለ

ምናም ትጠሉብ እግል ለኣትምዋ መዳሊቶም ክም ኣከደው፡ ምን ኣካን ለበጽሑን ተቅሪር ኣፍህመ።

መሰኡል ሸኡን ኣትመቃርሐት ሸቅል ሰፋረት ደውለት ኤሪትሮፕ ኣሰይድ ኢብራሂም እድሪስ እተ ኣሰመዐየ ከሊመት፡ ለእትፋቅየት፡ ክልኢቱ ለገባይል ግረ እንዴ ኢለኣትቃምት፡ ለእግሉ ከሰረ ወቅት ወኣቶብዩን እብ ናይ ሕበር ጅህድ እግል ልብሎሱ ኣርደት ለትኣጠፊሕ ክምተ እት ሸራሕ፡ እሊ ኣሳሰ እሊ እግል ልደቀብ ዶር ናይ ክሎም መዋዋኒን ክምቱ ሐበረ።

መሰኡል ሸኡን ኣትመቃርሐት ሰፋረት ፈደራልያይት ዲሙቅራዊያይት ጅምሁርየት ኢትዮጵየ ኣሰይድ ኣምሳሉ

ሀብቱ እብ ተረቲ፡ ክልኢቶም ለሚርሐት እምበል ሳልሳይት ጀህት እብ በጽሐወ እትፋቅየት ሕሉል ኣሳሰ ክም ልትኣከድ ሸክ ክም ኣለቡ እት ሸራሕ፡ ኤርትሮፕን ወኢትዮጵየን ሰካን ኸርቱም ወድዋረ ለዐም ተእዩድ እግል ልሸረሐ ለወደወ ኣሴራር፡ ተኣምርተ ናይለ እት ሰላም ወሸራክት ለዐምቱ ምራድ ክምቱ ወደሐ።

ጃልያት ኤርትሮፕን ወኢትዮጵየን ሰካን ኸርቱም ወድዋረ እብ ተውሳክ፡ ተእዩዶም እግል እንብትት ህሌት ዕሪት ወሰላም ለትሸራሕ ልእከት፡ እግል መሰኡሊን ሸኡን ኣትመቃርሐት ሰፋረት ኤርትሮፕ ወኢትዮጵየ ሰላመው።



ሳወ፡ ሰሚናር እግል ኣንፋር 32ይት ደውረት ክድመት ወጠን

ቃይድ መርከዝ ተእሂል ክድመት ወጠን ኮሎኔል ደበሳይ ግዴ፡ ዋጅብ ወጠኖም እግል ለኣግዱ ወናይ 12 ፈሰል ድራሰት ኣካዲምየት እግል ለኣትምዋ እተ ሐልፈት ሳምን ሳወ ለትከረው መሸተርከት 32ይት ደውረት ሰሚናር ሀበ።

እትሊ እት የም 4 ኣገሰት ለወደየ ሰሚናር፡ ዶር ሳወ እት በቃዐት ኣካዲምየት ወምህነት ሸባሳት፡ ረበዮት ወጠንያይ ሰዋልፍ፡

ብንዩት ገሮብ ወዐቅል፡ መፍሁም ሀውየት ወናይ ሕበር መንበር እቱ ዋሰሶ ሸራሕ ለቀደመ ኮሎኔል ደበሳይ፡ እተ ሐልፈየ 23 ሰነት እትሊ መጃል እሊ፡ ክምሰልሁመ እት ሄራር እስትሰማር ዐማር ወመዳፈዐት ዶር ዐቢ ክም ኣግዴት ወደሐ።

“ክል ግም፡ ናዩ ምዕራፋት ተእሪክ ልትዐዴ” ለቤለ ኮሎኔል ደበሳይ እሊ እት ሰእየት ለተህይብ

መርሐለት ኣሰክ ሳወ ክፋይ ለህለ ግም፡ ፈህሙ ወፈዛዐቱ እንዴ ወቀሉ፡ ፋእየት ፊራሮ ዐማር እብ ዋጅብ እግል ልሰርግል ወሙስተቅበል ባርህ እግል ለኣድምን እብ መትሰባል እግል ልክደም ትፋኑ።

መሸተርከት እተ ሀበወ ረኣይ፡ ዕልም እንዴ ረክበው እግል ሸዕዮም ወወጠኖም እግል ልወቅሎ እብ መዕጸም እግል ልክደም ለዐምቱ መዳሊት ኣከደው።



ኤሪትሮፕ ጽላክ

ክል ኣርቡዕ ለትጠ'በዕ ጀሪደት

መዳልያይ።

መሐመድ እድሪስ መሐመድ

ናይብ መዳልያይ።

ኣድም ሳልሕ (እቡሐሪሽ)

ለይ-ኣውት።

ፋዋና ኣደም

ዘህረ ዐሊ

ተለፎን። 121797

ፋክስ። 127749። ዕ.ሰ.ቡ። 247

ተውዝዕ ጀሪደት።

ተለፎን። 200454

ኣትኣመሮት።

ተለፎን። 125013። ዕ.ሰ.ቡ። 1284

ዐቤት ምን እብ ህዳይ ዕሞመ ዲብ ዲፕሎማ

ለዶር እሊ ጽሓይ ምንላ ተሐምብሰ ዲቡ ለትመዩት ማያይ ክፈል እዲነ እግለ እብ ብርድ ከራፊ ጋብእ ለዐለ ቅሩር ክፋል ምድር እድንዩ በርሀት ወሐፋነት እግል ተሀብ ትውዐል “ሰኒ ሙዩያም ማሚ፡ ብርድ ከፎ ትመዩ ዲብኩም ክርክምት ትትፈሰሱ፡ አዳም ወንዋይ ግድም መውዕሉ ልብጸሐ ልትፋረር” ለትብል መሰል ዐለት። ዑመር ዲብ ሸፍግ፡ “ዐቤት ተአክርኪ፡ አዜ እሊ ልባሰኪ እንዴ ጀረብኪ አገድ እግል ኒጊሰ ቀይሪ ከምጽኢ፡ ላመ መድረሰት ነሳፈት ህሌት ምኒን ምን እጨዕት ሹክ ሁመድ ሰጋደት ውልእመ ረያም ተ” ቤለዩ ወልባሰ እት ዘርፍ መጠዩ። ዐቤት ዮም ክም ትወለደት መሰለት ዲብ። አገድ በጊዳይ ትዳለይ፡ ልባሰ ዲብለ ረአሰኪ ለህለ ወርክዩ ምንኪ፡ ረቢ ልክርዑ ህቱ ህዩ ልርእዉ የዐለው አፎ ኢሸፍጠዉ እግልኪ ዐቤት? ወእንቲ ሸፎጡ እግልዬ ኢትብሊ ወኖሰኪ ኢትሸፍጠ፡ ደሐን ሐሬ ዕርኪ ምን ገብእ እንዴ ነሰአክዩ ሸፊጡ ጣይ አቡኪ! ህቱማ ዶል ምን መድረሰት ትትፈደሲ መሻቀዩ ናይ ቤት ገብእ እግልኪ ሸጠ ለክፈ ወሸፍጠ ለብሰ ልብል ሰብ መሰል ትግሬ” ቤለዩ ከንዋያቱ እግል ልንሰእ አሰክለ ዶሰ ለክም መክዘን ልትነፈዕ እቡ ቀንጸ ምነ። ዐድ ሐመድ ዐቤት እት እዴሆም ኢገብአት ግድም። ሰብ ለልትሐሰር እበ ረክበት፡ ልባሰ ጋረ ድራሰት ግንሐት ከንፈር ክሉ እግል ለለአተብል ትመለከ። ዐቤት ክመ ዑመር ለሀሰያቱ ተውጅሃት እብ ሸፋግ እንዴ ቀየረት ዶል ፈግረት ምነ ቤት እሲት ዑመር ሓዋ “ ንዲ እለ ነብረ ብልዲ፡ ሐሬመ መዓል መድረሰት ተአሚሩ ማሚ፡ አፍጠርኪ ወለ... ትቤ ወሐሬ እመ እት ገጸ ትባጠረት እግል መሰለኒ እንዴ ትሰብሰቡት “ፍዛኪ ዐቤት ምን እምመ ሰኒ ርሐመት፡ ጸጋይት፡ ዕጽምት፡ እምበል አትቃረቦት አትራያም ለኢተምር፡ ሕልብዬ ወድራርዬ ምን

ንሳለ ለኢልትፈንተዩ ምናመ ተረፍኪ ዐረር ግብኢ ዐቤት፡ደሐን ረቢ ሻኑ ወዴ ገደእምኪ! በሰ አዜ ዲብ ድራሰት ተረዲ ተዐለሚ፡ ወደለ ዲብ ተሐገኪ አሰእሊነ እንዴ ኢትክጅሊ” ትቤ ሓዋ አነብዐ እበ ዙቲ ጭፍር አራብ ላብሰቱ ለዐለት ዲብ መሰሰ። ምሴት-ምሴት ወፈጅር-ፈጅር ከሊመት ህዳይ ትትገረር ለዐለት ዐቤት እድንዩ ምሴ ወፈጅርተ ኢኮን ድረሲ ወተዐለሚ አፍጠረት።

ዕመር ወዐቤት አሰር አድሕድ ዲብ ገበኦ እጨዕት ሐቀ ትከረው፡ “ሚቱ ረአይኪ ዐቤት፡ ድራሰት ተሐዜ ሚኢኮን እንዴ ይእንደሌኪ ትብገሲ እምቤለኪ፡ ረአይኪ ወሸንሀትኪ እንዴ ይእንደሌ” ቤለ ዕመር እበ እዴተተ ክም ታትዩ ለህለ ዲብ መሰል እንዴ ጽብጠዩ። ዐቤት ፍጥሽ እብ ብካይ ወዴት “ሚ ገብኢኪ ሃልኪቱ? መድረሰት አቤክዩ፡ መዓሌሽ አዜመ ረዩም ዐድነ ይህሌን፡ ነአቀብል በሰ አባይኪ ልብኪ” ቤለ ከእንዴ ትገሰ አናቤዕ ዐቤት እበ ቱትሮን ጸዐደ ዕመቱ ማሰሰ፡ ወሐሬ “ነአቅብል ጣይ አቡኪቱ፡ በደል ትብኪ በዲር ወአሰአልኪኒ እግል ኢንትዐብ” ቤለዩ ከሐር ትወለበ። ዓቤት እሊ ዶል እሊቱ “አነ--አነ--” ትንፋሰ እንዴ ትሰሕብ እለ እዴዬ ሐቀ አቡዬ ቱቱዬ እበ አለቡ ከአቡዬ ለፈግረ እግልዬ መሰሌኒ ዲኢኮን መድረሰት የአቤኮ አቡዬ ዑመር እንተ ኢክለዋኪ፡ ለታቱ ጸልዕዬ እትሐሰሴት ዲብዬ። በሰ መድረሰት ላዝም እግል እድረሰ ብዬ፡ ረቢ ንሰእ ሰኔት ለቤለዩ ክእነ ክምሰልዬ ወእከ መሰሎ ልትረከቦ ከሀደፎም በጸሐ” ትቤ ዲብ ነሰቅ ወተሀቀብቅብ። አሰር አድሕድ ቱር-ቱር ዲብ ልብሎ ህዩ ጋድሞታት ዕጨዕት እንዴ አክለሰው፡ ሰጋደት ውልእ እንዴ ጤመው ሰዕክት ተዐሮረው ከአሰክ እንድላል ፈግረው። ዑመር እበ ብካዩ ወለቱለቱቱ ዝክርያተ ምን ዐንደል መርር እንዴ ልትሃጃእ፡ ወዐቤት

እት እገሩ ዲብ ተአላይም መድረሰት በርሀት እንድላል ገንገአው። መድረሰት በርሀት እንድላል ምነ ዲብ ሕሩር አራዲ ኤረትርዩ ለትአሰሰዩ መዳርሰ እብ መቅደረት ሰውረት ኤረትርዩ በሀለት ጅብሀት ሸዕብዩ ወናይ ዮም ደውለት ኤረትርዩ እት ሰማንያታት ለትአሰሰዩ መዳርሰ ተ። እለ መድረሰት እለ ህዩ ምነ እሊ እዋን እሊ እንዴ አድረሰት አሰክ እለ ተሐለልኮ እንዴ ኢትብል እት መቅደረት አዳም ለትወቀለት ተረት ለ ግ ዴ ት ወተአገዴ



ለ ህ ሌ ት መድረሰት ምን ዘበን ሰውረት ለዐለትተ። ሰውረት ኤረትርዩ እበ ለዐለት እግል መቅደረት እስትራተጅዩት ህዩ እግል እለ መድረሰት እለ ምሰለ ለዐለ መራሕል ንዳል እሊ ጨቢብ ወደግ እግል ለአንግፈ ቀድር እንዴ ትበሀለ እቱ ተሀንደሰት። ዐቤትመ ዲብ እሊ ወደግ እሊቱ ለመድረሰት አሰተብዴት። እሊ ወደግ እሊ ዓላቡ ምንመ ልትበሀል፡ እበ መድረሰት ልትሰሚ ዐለ። በሀለት መድረሰት በርሀት እንድላል።

ዐቤት መድረሰት አቱት። ፈሰለ እንዴ ረአው ህዩ ምሰል ደረሰ ሰነ ወግመ አምሐበረት። እተ ዶለ አውል ክምክሉ ደረሳይ ለገበኦ አግውኒቶም እግል

ትግበእ ትቀድር፡ ለኪን አክለ ወቅት ጌሰ እንዴ ትልእም ወትለምድ ጌሰት። ዕመር እግል መራቅቢን ናይለ መድረሰት ለዐለው ከረ መርሐም እቡነ ሓምድ ሙሰ ወአቡነ ዕመር ወድ ዐሊ ወምን መደርሲን ለረክቦዮም አንፋር እንዴ ትፋነ እበ አሰክ ጋሩ ሸንፈረ። “እብ መዓይር ደሐን እደልዩ፡ አዜዲ አሰክ መድረሰት ትትፈደሰ ተወላለብ እንዴ በጽሕኮ እግል አቅብልቱ” እንዴ ቤለ ፊናታቱ እንዴ አትባዝሐ ጌሰ። ሳዐት 12፡ 45 በሀለት ደረሰ ዶል ፈደሰው ዕመርመ ተለው ቤለ። ወለቱ እንዴ ነሰአ እንዴ ለዐይር፡ “ድራሰት ከፎ ረከብክዩ ዐቤት?” ቤለዩ አዜመ ምንላ አሰቡሕ ለሳደፈቱ ዲብ ልትሓፈዝ።

“ ተ ማ ም ወእንሻአለህ እንዴ ደረሰኮ ወተዐለምኮ ፈኻ ዲብ ዐድ ደሐን እፈዴካቱ እገብእ፡ በዐለ ዕዳይ ሐድጌኒ ምን ገብእ” ትቤ ዐቤት ዲብ እገሩ ዲብ ተአላይም። አነ ጣይ አቡኪቱ እንዴ ደረሰኪ ደረጃት ሰኔት ዶል በጽሐ ፈኪ ትፈደ በሰ፡ ለምነ እትፋኔኪ ምክሐ ናይ እሎም ድራሰትኪ ለሐዙ ለይህለው ኢቲደይኒ፡ ወዐቤኪ ወደረሰኪ ምን ገብእ እግል ወልናመ ነሀዴኪ ኢኮን።” ቤለዩ እንዴ ልተልሀዩ። ከሊመት ህዳይ ዐቤት እፍንድቅተ ክም ህሌት ዕመር ሰበት ኢደላቱ ዲብ ኢኮን፡ ከረ እሊ ጋድአት እግል ርሐ ኢፈትዩ ወእግል ጸሩ። ዐቤት ምን እለ አምዕል እለ ወሐር እብ ትሉሉይ እንዴ ኢተአትካርም በሀለት ክልኤ ሰነት ዲብ ደርሰን ተርፈት ዲብ 3ይ ፈሰል ወሐሬመ ዲብ 6ይ ዲብኢኮን፡ እምበል እትካራም ደርሰት። ሰዳይት ዑመር እንዴ ኢተአትካርም ምነ ወዐቤት ዲብ ደርሰቱ ዐሰር ወአሮት ፈሰል ክም በጽሕኮ አመተ ኢተአመረት ዑመር እድንዩ ትሰረሐ ምነ፡ እብ

ሕማም ትወፈ።

ሞት ዑመር ከሳረት ዐባይ ተ ለዐለት እግል ዐቤት። ለሞትመ ሰኔት ድረሰተ ቅሩብ ዲብ ህሌትቱ ለሐሰለት። ዐቤትመ ሰኒ ደንገጸት ላኪን ምን-ምን ተአተክሬ ወሐሬ ተአተክሬ ወገበአት በዲር እመ ወአቡሀ ወየሀበት ወአዜመ ለሚሳይ እንብዕ ይትምናህ ላቱ ዑመር። ዐሰር ክልኤ ፈሰል መድረሰት ሐቀ ደብአት አሰክ ሳዋ እግል ልትበገሶቱ ልትብሀል እቱ ለዐለ አውካድ ቱ። እት ትትወሀም ምነ ዐሊ ወድ ዑመር “አብሸርኪ አናመ ለአቡዬ ወድየ እግልኪ ለዐለ እብ ክሉመ ይዐሬ እንድኢኮን፡ እብለ መቅደረጅተ እሳዕደኪ ወአዜ ድራሰት ዲብ ሳወ ወደወ ሕኩመት። ሳወ እግል ትዳለይ በሰ አዋክረ እግል ተአብጽሕዩ ብኪ ላዝም” ቤለ ዲብ ቤቶም እንዴ ትላከዩ። እቡዬ ዑመር ረቢ ልርሐመ ግረ ታርሀት ሓድግ ክም የሀለ ለአምር፡ ላኪን አነ ሳወ ላቱ በሪ ቱለለ” ትቤ ጭብዕተ ዲብ አፋህ እንዴ ትናክሽ ዐቤት። “ሐበት ምሽክለት አለብኪ ወሐሬ እንቲ በይንኪ ኢኮን ትትክረይ ለህሌኪ ምን ኩለ ወጠን ኤረትርያ ቱ፡ በሰ ተረዲ አብሸርኪ አናመ ፍርሰት ዲብለ እረክብ ዲቡ ወቅት እግል እጋነሐኪቱ ዲብ ሳወ” እንዴ ቤለዩ አትሳጅዐዩ። ዐቤት ሰነት 2003 ምሰል 17ይት ደውረት ክድመት ወጠን ወደረሰ ዋርሳይ ይክአሎ ወብክር ሳወ እግል ድራሰት ትከሬት። ዲብ ሳወ ዐቤት ምነ እብ አደቦም ወድራሰቶም ሕሙዳም ለገብአው ደረሰ ዲብ እንተ ሰነት ድራሰተ እብ 2.3 ደረጃት ዲብ ማትሪክ እንዴ አምጸአት ተዐወተት። ማይ-ነፍሐ እንዴ ሐልፈት ህዩ እብ ገበይ አድረሶት እብ ዲፕሎማ እንዴ ትደሐረት ምን እብ ህዳይ ዕሞማ ዐቤት ዲብ ዲፕሎማ አተበለት።



ዲብ ቨረክ ሳሕል-ሰሕረ

ብንያም ሀይሌ

ሓይሳም ቄርአት ዕንጃረ፣ እለ ተሌ ምን ክታብ መቐይሮ ሓርያመ ለሀሌነ ቅሰት አንሳት ጀለ ተሕሪር እለ የም እንገንድል እተ ለሀሌነ ሕርርት ኤረትርየ ለሓላፊያሁ ንዳል እግል ተአርኤ ትቀድር ለእንቤለ ቅሰት አማን እግል ንቀድም እኩምቲ። እግል የም 1^ኛ ክፋል፡-

ቅሎዕ ምንኬንላ ምዱድ ጋድም ቅብለት ምፍጋር ጸሓይ ሳሕል ለሐውጽ እት ህለ ነፍሰ ትፈትዩ ዐለ። እንክር ምፍጋር ጸሓይ ዔጸትክ እንዴ አትሌኩ፡ እብ ምራየት ቀደምክ ለህሌት መሳፈት ዶል ተአቀምት ምድር ወዐስተር ክምሰለ ዝላም ለጽሄት ለህለ ምኑ ወዳሐት ለልትመጣወር ዐለ። እተ ዶሉ ህዩ ሙናድል ደሚሩ እብ ገናዐት ዲብ ልትለወቅ ልትረኤ።

ውላድ ሰርየተ እግል ሉሉ፡ እለ በክት እለ ኢሰአነው። ምናተ፡ ለደባባት ቁፎህ ክምሰለ ትከመህ ንህብ ዲብ ቀደምም እት ልትገናበዩ ሰኩብ ከልኢያሆም። እግል ሰኢን መምለኩትን እንዴ አወጀየ ነብረ እቱ ለዐለየ ጋድም ሙናድሊን ዔረው እቱ። እተ ዶሉ ሐቲ ረሻሽ ለጸዐነት መኪነት ድርዕት (ኣንፊብያን) ዲብ ትለክፍ እቶም አስኮም ትገምቤት። ጣግየት ሐጺን (ሄልመት) ለለብሰው ዐሳክር ህዩ እት መሸንገለ እንዴ ገብአው ዲብ ኔሽኖ ዲብ ተንሺን ለአተ ሙናድል እግል ልግለው ልትባደር ዐለው። ላሊ መክረህት ምዩያም ለዐለው ዐሳክር ደርግ፡ ለዐለ እቶም ኖጀዕ ዲብ ረሕመት ለአለቡ አዋይን ትበደለ።

ግረ ታርፈት ለዐለት ሉለ ለትትበህል ሐኪመት፡ እተ ሳምን ለህ ምን አምን ሰውረት ለመጽአየም የማኔ ለልትበህል ሙናድል ኩብዱ እንዴ ትዘበጠ ዲብ ልሽሕግ ምን ቃብል ረኤቱ። “ከላሲ፡ እግል ልትጸበጥ ቱ” እንዴ ትቤ ዲብ ተሐሰብ፡ ናይበት ቃእድ መጅሙዐት ግምጃ ወልዳይ እብ ሸፋግ “ግሰኮ ግሰኮ” እንዴ ቴለተ ክምሰል ሰፊረት ነፍረት። ምነ ልትሰመዕ ለዐለ ወጀዕ ናይለ ተሐከረው ሙናድሊን ባኮት፡ ርይም ክምሰል ትቤ፡ እብ ክለ ሒለቶም ለልሰው ሙናድሊን ምን ቃብል ረኤት። ሸንጠት ገዛፍ ሕክምነ እንዴ ጸረት እት ረአሱ ክፋፍ እንዴ ወሰከት ዲብ ተህረክርኩ፡ ገጽ ግረ ውልብ ትቤ። ለአንፊብያን ክሉ ረአሱ እተ ኢትጸበረተ ነሳፈት ክምሰል በጽሐት ልብ ክፊት። ግምጃ እብ አመተ ኢተመረት ቀደመ እንዴ

ወድቀት ለትትባለሕ እቡ ብሰር መሀዘት። ገጽ ዲብ ሐጸ እንዴ ደገለት እደየ ክምሰል መስቀል እንዴ ማደደት ግናዘት እግል ትምሰል ዲብ ምድር ትመደደት። ለዲብ መርከብ ለዐለት ሸንጠት ሕክምነ እግል ተአፍግረ ላኪን በክት ኢረክበት።

እብ ዶል-ዶሉ እብ እንክር ናይለ ደባበት ለዐለት እቱ ባኮት ልሰትመዕ ለዐለ ዘብጥ፡ “የምክን እግል ገናይዝ ዘብጦ ህለው” እብ ልብል ወግም ሰኢ ወአማን ንዩተ ሓጨረት። “ተቡብ! ጭዝ” ዲብ ልብል እብ ረአሰ ክምሰል ሐልፈ ገርብ ሰኢ ወአማን ሸዐለ። ለአንፊብያን ሰኢ ክምሰል ቀርቡተ፡ ምራቀ እንዴ ቀርደዐት ወሐጠቱ። ናይ ደንጎበ ምን እድንዩ ለትሳርሐ ርሳሰት እግል ትትከበት ህዩ ለሸም ብህል ዐለ ዕንታተ ሰኢ ወአማን ጨቅጠቱ። ተአተንፍሰ እት ህሌት፡ ለምለዐል ጫቅጠተ ለዐለት ሸንጠት ዝያደት ገርብ ሀንዘዘት። ለአንፊብያን ክምሰል አደገት ምኑ፡ እብ እገርም መጽሐው ለህለው መሰለ እተ። እብ ሸፋግ “አንሳይት ክምሰል አነ ለአሌሉኒ ገብእ?” እንዴ ትቤ አርወሐተ ትሰአል እት ህሌት፡ እግል ግናዘት ተብዐት ብዘሕ ክምሰል ኢልትአየሶ እቡ እንዴ ሐሰበት ቱ።

ገርብ አንሳት መብዝሐ ዶል እብ መባትኩ ልትሌሌ። ናይሒ ጸሎ፡ ነሐር ወሕጭር። ናየ ላኪን አክል እለ ለልትፈረግ ኢኮን። እብ ፍንቱይ ዲብ ውሕዳቶም ተድራብ እት እንተ፡ ጸረ ተአትጌግዮም ክምሰል ዐለት “መለህይ ነዐ ምሰል ኒሺን” ዲብ ልብሎቱ ለየንዱት ዐለው። ላመ ጀብጀብ (ሙሩን) ጭገረ ምን ገብእመ፡ ክሉ ሙናድል ወድዩቱ ለዐላ ቱ። ለአንፊብያን አሰክ ዐስር ምትር ቀርቡተ። ፈርሀት ቅያሰ ሓልፈት ዲብ ሐጠር ሰበት ትትበደል “ኖሶም ለአምሮ” ዲብ ትብል እግል አርወሐተ አትሓጠረት። ለደባበት ክምሰል ሐልፈተ፡ አሰልፍ ሞቶረ ተአረምሸ ለህሌት መሰለ እተ። ትረይም ክምሰል ዐለት እግል ትፍህም ላኪን ይአደገት። ለዶል፡ ሐጸ ቁቄ ለዐለ አንፈ “ፊፍ-ፊፍ” እንዴ አበሰት

ፎቃየ እንዴ ሐከት ነግፈቱ። አሰክ ድፍዮም ለአቅበለው ገሌ ዐሳክር ዲብ ርሽመትለ ደብር ዲብ ልትቃሰው ልትረአወ እንዴ ዐለው ምክራዮም ትቀዌት። የምክን ህተ ለኢትርእዮም ዋርድየት ምን ቅብላት አው እብ ክሻፈት ሪም ናይለ ህተ ዐለት እቱ ጋድም እግል ልራቁቡ ቀድሮ ዐለው። ለገአት ሐረከት እግል ኢቲዴ ህዩ ትጀመለት። ብዘሕ ክምሰል ጸንሐት ላኪን እብ መልሃየ ሸንጠተ እንዴ ሐርጠት፡ እግል ቃሰን ለዐለ ገርብ አትዐረፈቱ። እብ ሰብብ ለህበት ረሰሰ ለዐለ ገርባመ ሐከቱ። “ምን እለ መለገት እለ ህዩ ከአፎ እግል እትባለልሕቱ?” ለትብል ሀመት ዲብ መከ ዐንበልበለት።

ለዘብጥ ዲብ ረይም ወለሐውን አክለ ንሴ፡ እግል መሰለሐተ ክም ኢኮን ፈሀመት። ሰእየተ ዲብለ ክትል ሙናድሊን ለዐለት ጽልመት ሌጠ ተሐደደት። ምናተ ዐሳክር አባይ እብ ህተ ዐለት እተ አካን እንዴ ኢለአቀባብሎ ክምሰል ኢልውዕሎ እመርቱ። እብ አማን ላኪን “ግናዘት ተ” እንዴ ቤለው እት ልርኡ ወሐልፎ ገብእ? ክምሰል አጀኒት ቤቼ ቤትክ ዲብ ልብሎ ወልተልሀው ለሰኩቡ፡ ህታመ ትተርጀግ ለህሌት መሰለ ዐለ። “ወንበዴ እሻጥረኛ” ዲብ ልብሎ ጸፈፍዕ ዲብ ወድወ ወንሱሐው ሰበት ትካየለ እለ ሰኢ ሸዕለለት።

ሐጽ፡ አክል ሕድ ክምሰል መርተበት እግል ትሰከብ እቱ ውጡይ ቱ። እብ ሐርብ ወሄራር እንዴ ተአንጎጌ ዐልኩ፡ ሐፊ እብ ራሐት ዶል ትሰክብ ዲቡ ከፎ ወጠዐመ፡ ምናተ ለቲለል ክምሰልሁ ይዐለ። ሉሉ፡ እብ ህሙም ዲብ ተዐርግ ወትትከፊ መጦር እለ ተዐብ ልትጸዐን እተ ዐለ። አከይ-ውዳይ ለውድየ ዐዶ እግል ኢለቅህም ዲብ እት ትፈርህ መከ እብ ሸፋግ ፈያገ። ከንፈረ ነክሸት። ጨቅጠየ ምንገብእ ወለ ምን ባልሰ ትንፋሰ እንዴ ሐብዐት ማይተት እግል ትትመሰል ዳሌት። ድገለባይ ሰምጦ፡ እብ ደም ሸሂድ ተፈሪ ሞሉል ሰበት ዐለ። ዲቡ ክምሰል ትዘበጠት እግል ልእመኖቱ ሰእየብ። እምበል እብ ብዝሐ ሀወእ እንዴ ሰሐበት ትንፋሰ ሐቤዕ ቀደም ክልኤ ሳዐት ለሞተት እግል ትምሰል ገርብ እግል ተአንሸፍ እግል ትቅደር ቤ።

ክርን ዐሳክር ዲብ ትቀርብ መጸአት፡ “ወንድ ነው ሴት?” ለልብል ሰአል ልትሰመዕ እት ህለ ሉለ አክደር ልባሰ ለለብለው



ጦር ሰራዊት ጸላይም ትካየለው እለ። ከርከለሕ ልብል ለዐለ ዐስከሪ ላኪን ዐፍሸ ረፍዕ ለህለ መሰለ እተ። ብዕድ ዐስከሪ ዲብ እንዴ ሸአገ “ሴት ነቺ መሰለኝ” በልሰ።

“እንዴ! የም ሸዕብዩት አዋልድ አንሳት ሌጠ እትብግሰት ዐለት መሰለኒ።” ቤለ ለሳልፋይ መሰእላይ።


ካልኣዩ ዲብ ልትሰሐቅ፡ “ዕውር ሕደግ ወሐንኪሽ ልብሎ እት ህለው እግል ልፍገረ ሰበት ኢቀድረያቱ” ልብል እት ህለ፡ ሉለ ዲብለ ሕመት ለመሰል ሕብሩ ባርህ ወቀይሕ ዕስር ትዋሰፈ እለ። አክል ሕድ ዕስር ከራይ ትሰሐቅ መሰለ እተ። እተ ዶሉ ፈርድ ዲብ ለዐምር ሰበት ሰምዐቱ ጭገረተ ትረበበት። ዝናድ ክምሰል ትሰሐብ ቀዕ ለትብል ክርን ክምሰል ሰምዐት ላተ እት ረአሰ ለህንጦሞል ለዐለ መለክ-አልሞት ትገልጸጸ ምኑ። ለፈርድ ናይ ኮምሽኔር ሰርየተ ገብአት ምንገብእ ላተ ርሳሰ ክምሰል አለቡ ተአምር ዐለት።

ሐቆ ወቅት ሐድ ዲብለ ሐጸ ሸለሐፍ-ሸልሐፍ ዲብ ልብል ሐከሽ እገር ሰምዐት። ሉለ ለመጽንሐ እግል ልግበእ እለ እንዴ አብዘሐት ለሰሐብቱ ሀወእ እብ መልሃየ አፍገረቱ። ወቅት ዲብ ተዐቅብ ወረአሰ እብ መልሃየ ዲብ ጣዌ ባኮት አቅመተት። ክሉ ክፋፍ ወሸንጠተ ንሱእ ዐለ። ልሰዕ ቃሰን ለዐለ ገርብ እንዴ ኢተሐርኩ፡ ምን ሐዲሰ ክርን አዳም ሰምዐት። አዜመ አሰክ ቀሩብ እንዴ ታኬት ሀወእ ብዘሕ ዲብ ትሰሕብ ኩብደ ነፈሐት ወትንፋሰ ሐብዐት። ለጭፍር ናይለ አዳም ዲብ ቀርብ መጸአ። ህታመ እብ መጆቡ ገርብ ዝያደት ቀርሰሰ። ዎሮት ዐስከሪ ዲብ ፈንዶተ እንዴ

ረድሀየክ “ይህቶም ሴት ናት” ቤለ። ሸውየ ሓልፍ ምን ለዐለ ብዕድ ዐስከሪ ህዩ፡ “ሆድወ ነቺ የተመታቸው” ለትብል ህግዩ ሸርዕብት ሰምዐት። ዲብ ገርብ ለዐለ ደም እንዴ ረአ ልትሃጌ ክምሰል ህለ ህዩ ጌመመት። ጭልን-ጭልን ለትብል ክርን ሐጺን ሰበት ሰምዐት ህዩ ሰኢ ወአማን ገናብተ ትካረበት። “በዋሪይም ምን ፎቃዮም እግል ልክረው አው እግል ልርፍዕዉ ልትሰመዕ ለዐለ ናይ መናዱቅ ክርን ገብእ” እት ትብል አርወሐተ ቃሸሸት። “መን አመረ?” እንዴ ትቤ ለጌመመቱ ብሰር ህዩ ለዐውተ ክምሰል ዐለ ልብ ከፊት። ምን ሐዲሰ ናይ ነቢር ሰእየት ወዳት።

እት ረአሰ ደምቀተ ሰቅልት ለዐለት ጸሓይ ኢኮን እንዴ ትመደድክ እግል፡ እብጣርካመ ለትርሕም ይዐለት። ረመጭ ወካቤት እግል ኖሱ ለለአነድድ ዐለ። ለዲብ ገርብ ዐለ ደም ሸሂድ መለሀየ ናሽፍ ምንመ ዐለ፡ መትዘግጡ ላኪን ልሰዕ ልትካየል እለ ወለሸዐልል ዐለ። ምን አርወሐተ ህዩ መሸገት። ላኪን እብ ሰበት መንገፎሃቱ ትሻቀል ለዐለት። ጽልመት ክምሰል ወክድ ለሀይ ርምጭት እለ ኢተአምር። እተ ዶሉ ህዩ እብ ሕሳብ ዲብ ዝክርያት ወመዓላት ብርጌደ ተዐዲት።

ክልኤ ቦጦሎኒ ናይ ብርጌድ 23፡ ዲብለ ሰርጉል ህጁም ተሰነይ ሐቀለ ሻረከየ ምሰለ እት ጀብህት ሐልሐል ለዐለት ቦጦሎኒ ሰለሰ አሰክ ወድጃብ ትብገሰዩ። ሉለ ዲብ ሕክምነ እንዴ ዐለት ተሓበረት እቶም። ዲብ ዴሽ እንዴ መጽአት ምሰል መልሂተ እት ትትባደር ዲብ ገበይ እት ህሌት ክሉ ለቴል ትዋሰፈ እለ። ትተላሌ . . .



እድራሱን ደረሰ ወሽቃለ ጃላብ ሐቅ

ዲብሊ ካትብ ወገኑን ተጽዕኖ ላቱ አለም-ብድር ተሰፋይ ምን ፈጽሞ እንደ እስከ እስከታወቀ ወሰኑ (1952-1962) እብ ልብል አርእሰ ለከባዩ እት ምዕራፍ 15 ለትኩባብ አዋይን መቃወሙት ዲብ ኤረትሮፕ በህለት “እድራብ ደረሰ ወሽቃለ ” ለታይን ጽባዋ እግል የም 10ይ ክፈሉ

እድራብ ሽቃለ ወፍገራቱ
ኣትኒን 10 ማርሰ 1958 አምዕል ዕድም ሰባት ዐለት፡ ምን ሳዕት 6:00 ናይ ኣሰቡሕ ኣዳም እግል ልጅመዕ ኣሰቡብደ፡ ምድር ዲብ ጸብሕ ክምሰል ጌሱ ብዝሐሐ ሽዑብ ምን መሰኢት ወለዐል ዲብ በዝሕ ግያሱ፡ ክሉም ዲብ ለሻረኸው ለለክሱደ አማንተ፡ “እድራብ ናይ ሽቃለ ሌጠ እንዲ ኢጉብኡ ናይ ሽዑብ ኤረትሮፕ ጉብኡ” ቤለ ጸጋይ ከሕሳይ፡ እምበል ሽቅየት ባዲ፡ ሽቃለ ማይ ወክህረቡት ላቶም እግል አርወሕ ለለትሐዜ መኣሰሳት፡ ብዕድ ለትከሰተ መሰነዕ ልግበእ ወድካን ይዐሉ፡ “አሰመረ ትሸለለት” ቤለ ምር ናይ ካርጅ ሰሕፊ፡

መትዛዘምለ እድራብ እብ ክሉ ጀሃቱ ታምም ጀላብ እግል ልግበእ ጌማም ዛይድ ለጉብኡ እቱቱ ለዐሉ፡ አሰልፍ፡ እግል እድራብ ሕጌ እንዲ ወደው ለጉብኡ ናይ ዝልም ወዘማቱ ላቱ መዋዲት ጀላብ እግል ኢህሊ፡ 700 ዲብ መናኸም ናይ አምን ክምቶም እሻረት ለአሰረው ሰብ ዐጀላት እግል አሰመረ እብ ማዲደ ዲብ ደውሮ ክምሰል ራቅጥ ጉብኡ፡ ዲብ ቀበትላ ኣላፍ ሽዑብ ለተኣከበ አግደ ናይ እድራብ ኣካን ህይ ናይ መህረጃን ዕፌ ለመሰል ተማሰል ጉብኡ ሰባት ዐለ ፋሬሕ ወልውቅ ደሚር ማሸል ዐሉ፡ ገሌ ምን ቀርብ ተማሰል እሊ ለመሰል ዐሉ፡

- ዕንታቶም እብ ሻሽ ለትግልበበ 68 ነፈር፡ “አንፋር ምድልሰ ሕጃባምቶም ለለኣሰሚዕ አሰራር፡

- ምሰል እሉም ለልሄርር፡ እት እዘኖም ግጥን ለትላወሽ 6 ነፈር፡ “6 ስክፋተርያት ሕክሙት ኤረትሮፕ ጸማይም ቶም” ለተመዘኑ፡

- 33 ሽሚዕ እንዲ ኣብረህው ፍቱሕ፡ ዝሞ፡ አማን ለጠልፀ - እግል መሓብር ሽቃለ ለወክሉ፡

- እግል እሉም ክሉም ለመሬሕ፡ ምር አብሰዱር ለጸብጠቱ እብ ምርኩሽ ለልትመንቀሽ ሻብ - እግል “ሁን አግቡይ ማርሐት” ናይለ እብ ሕማም ዕሬ ለለሐንኸሽ ማርሐት ሕክሙት ለወክል አው ለለኣትዐግብ...

ዲብሊ ናይ ሰልፍ እብ ጀህት ፖሊስ ለትረኣ ለጉብኡ ልግበእ ናይ መኳዕ መዋዲት ይዐሉ፡ ሐቱ ዶል ምን ገጽ ፈጅር፡ እብ ሚጀር አርጋቸው እመሻው ለልትባህል ናይ ፖሊስ ዛብዋ ለልትመረሐ አንፋር ፊልድ ፎርሱ ሽውዩ ናይ አትፋረህ መዋዲት እርሑያም ምንመ ዐለው፡ ይኣተላለው፡ እብ ቃብል እሊ እት ረኣሰለ እድራብ እግል ልግበእ ለኣጀዘ፡ ኮሎኔል ተድለ ዐቅቢት ለሽቃለ መክረፎናት ዐባዩ እንዲ ትካረው መሓደራት እግል ለአሰምዑ ሰባት ሰምሐ፡ ለእድራብ እብ መሰከብት እግል ልተላላው ውጡይ ቲለል ክልቀ፡

እለ እጃብት እለ ለህይብ እት ህለ ተድለ ዐቅቢት፡ ለሐፊ ልትወደሕ እት ሕድ ለኢባይእ ቲለል አፍኑሩ ለለርኤ ህግዩ ተሃገ፡

“ክምሰል ሐብም እግል እምክረኩም? ኣነ እንዲ አሰርኩም ወእንዲ ዘበዋኩም ወዐጉብኩም ለእብ ክልኤ እዲህም ለበለዶ፡ ዲብ ክልኣት ከርሲ ግሱያም ለአጽብሐው ምን ልትፈህሞም እንዲ እቤ ወቅት



ጀላብ እግል እርኩቤ እግልኩም ህይ ሰባት ይኣሰኩምቱ ክምሰልሁ ለወዳኑ፡ አዜ ላኪን ሐለትኩም ውበዝሐኩም ርእያሙ ህሉ፡ ዐድ እጽልሙታም ህሉኩም፡ ምን እለ ወለዐል ለትወዱም አለቡ፡ እሊ ሰባት ወዳኩም ምድልሰ የም አምዕል እንዲ ትጀመሪ ለቃኑን እግል ልበድሉ ኢኮን፡ ሰባት እሊ፡ ዲብ ሽቅልኩም አቅብሉ፡ ... ኣነ ህይ ለእብ ክልኤ እዲህም ለበለዶ ዲብ ክልኣት መክበር ጉሲያም ለአጽብሐው ኖሼ እግል እትሃገዩም ቱ...

በህል ተድለ እግል ሽቃለ ሲኒ አትፈክረየም፡ ምሰለ ቀደም እድራብ አሰክ ናይ ሰነት 1963 ክሉ ረኣሱ አሰክ ልትቀየር ህይ ግረ እድራብ ክሰኩም ለዐለው ምሰዳራት ክሉ ረኣሱ ሰባት ኢትመሳኩ አትዐጀቡም፡ ወቅት ሰባት ይኣሰኩም ላኪን መክረፎናቶም እንዲ ተክለው አሰክ ተዕቢያቶም ወመሓደራቶም ጌሰው፡

ሳዕት 11:00 ክምሰል ጉብኡ ሚርሓይ ሕክሙት አሰፊህ እግል ርኢሰ ወናይብ ርኢሰ ምድልሱ በህለት እግል ሓምድ ፈረጅ ወዲመጥርሱ ክምሰልሁመ እግል ሰክፊታሪ ሽኡን እጅትማዕየት ዐሊ ራድኣይ፡ ዳይሬክተር ሽኡን ከርሰ አገማች ዘርኣም እግል ተድለ ዐቅቢት እንዲ መርሐው አሰክለ ኣካነትላ እድራብ ጌሰው፡

ሽዑቤ በረ ምን ዘርቡት ከረሰት ማርያም አሰክ ምሰግድ ዐቢ እግል ህለ ፋዬሕ ሚዳን መልኣይ፡ እብ ዐሰርታት ኣላፍ ለልትዐለብ ቱ፡ ቀደም ለህ ተኪኤ እልፈ፡ ዘመክራል ዐቅባሚክኤል ወጸጋይ ከሕሳይ ልትሃገው ሐቆለ ጸንሐውቱ ሚርሓይ ሕክሙት መጽእ ህለ ከትከቦቱ ለልብል ትእዝዝ ተድለ ዐቅቢት ለመጽእ፡ አሰፊህ ወቱልየቱ እብ መኳይን አሰክ እትጀህ ሚዳን እብ ህሉት ምን ግረ ለህሉት መንገሉት (ካንፔሎ) ከርሰ ሐረት ከረሰት ማርያም ክምሰል አተው፡ መኳይኖም እቱ እንዲ ኣገመው ምኑ ምቀደም እት ሽዑብ ተሓበረው፡ እብ ምግብ

መሕሊፊ ክምሰል ረክበው ህይ፡ ዲብሊ መክረፎን ለዐለ እቱ መሰረሕ ዐርገው፡ ገሌ ምኖም ሚርሓይ ሕክሙት አሰፊህ ተሃገ ምንጉብኡ እግል ለኣክፍእ እትናቱ ምን ትብል ፈርህት፡ ለኣዳም እግል ልፊንጠሩ ሓሳባም ዐለው፡ ለበዝሐው ላኪን እግል ልታከው ቀረረው፡ አሰፊህ ህይ ተሃገ፡ ጸጋይ ከሕሳይ እብሊ ለተሌ ልዘኑሩ፡ አሰፊህ ፈዳብ መትሃግያይ ቱ፡

ቅድረት ክም ቡ ቱ አምር ለዐልኩ፡ ክምሰል አምዕል ለህ ህግዩ እኪት ዲብ ልትሃጌ ሳምዑ ይኣኑ፡ “እሊ ጅምሳም እግሉ ለህሉኩም እድራብ ናይ አደብ ለኣለሞም ሽቅል ቱ፡” ቤሊን ለአወላይት ዘዐቱ፡ “ምእት ወክልኤ ማዳት ለቡ ቃኑን እንዲ ጉብኡ ለምእት ወሐቱ እንዲ ትከብትኩም፡ ሐቱ ሰባት ትወሰኩት እቱ ይኣክብቱ ለልብል ነፈር ገሊል-ኣደብ ቱ፡ እብ አብኩም ወኣብዕኩም ለይዐለ ቃኑን እብ ፈድልይ ፈድል አሰፋሃቱ ለትረከበ... ኣነ ህይ እት አምርቱ ክምሰልሁ ለወዳኩም፡ ጽዕነት ገመል እት ምር አድግ ምን ትጽዕነ ዳዳቱ ፍት ትብል...” ምን ሽዑብ ሆሆ ዲብ ልብል ህግዩ ክልኣይ፡

በርሄ ዐንደሚክኤል እብ ጀህቱ እሊ ለተሌ ዘክረ፡

(አሰፊህ) ምሰለ ነዐር ለወዱ ገዳይም ለኢትትመሳይ ህግያቱ ለተሃገ፡

“...እለ መቅደረትን ኢኮን፡ ሕነ መሕበር ንኡሽ ሕነ ሕክሙትመ ይእንቀድር፡ ጽዕነት ገመል እት አድግ ምን ትጽዕነ እግል ልትሰበር ኢጉብኡ ምንጉብኡ ኢቀድሩ፡... ለተሐዘው እብ ገበይ ሰላም እብ ብሸሽ ለጉብኡ ጋር ቱ፡ የም ቤጭ፡ ለትመጽእ ሰነት ህይ ዲርህ...” ክምሰል ቤሊ... ሽዑብ ትካፊ እግል ለበሉ ወእግል ልቅበቡ አምበቱ፡ ሕነ ላተ ሕደን እምቤ...

ለ ሆሆ! ዕየርመ ሰባት ተሓበረ እቱ ዲብ ደማሽ እግል ኢልሕለፍ ሰባት ትፈረህ፡ ሚርሐት ሽቃለ ወቅዋት አምን እግል አሰፊህ ወቱልየቱ እንዲ ከርደኸው እት ከርሰ ዘርቡት ከረሰት ማርያም አተምሞ፡ እብ አዳም ለይዐለ እት ተኣቱ ዲብ ህሊክ ምን ግረ ለህለ ቢባይ ዲብ ባር ትሬሱቲለ (Tre Stelle) እንዲ ትካፈ እት ክልል አሰክ መክተቡ አቅበሉ፡

ግረ ለተርፈ ተድለ ዐቅቢት፡ “ሚርሓይ ሕክሙት እብ ተማሙ እት መጽእኩም ህግዩ ሰባት ክልኣኩሙ አቅበሉ፡ አዜ ዲብ አሽቃላትኩም አቅብሉ... ለትብል ህግዩ ኖሱ እብ ገበይ ርኢሰ መሕበር ካሻሌር

መሐመድ እብ መክረፎን አዘዘ፡ ቀደም ለህ እት ሽቅል ኢንኣቀብል ለልብል ትእዝዝ መሕበር ሽቃለ ለሰምዐው ሰብ እድራብ ላኪን፡ አሰክ ኣብያቶም ውበዕድ ወራታቶም እግል ልትፈንጠሮ አሰትብደው፡

ፖሊስ ላኪን በርናምጅ ብዕድ ዐለ እሉም፡ ልሰዕ ለሽዑብ እንዲ ኢልትፈንጠር ህይ፡ ዐጀላት ምን ሰብኡ አው ጸብጣመን ለዐለው ዲብ ዝቡውን እግል ለኣክብን አምበቱው፡ እሻረት ሰባት ጉብኡ ቱ፡ ለጉብኡ ናዩተ ለበሊ ነፈር ፈጅራት ምን መክተብ ፖሊስ ትራፊክ እግል ልንሰኢ ቀድር ዲብ ልብሎ ህይ፡ እግል አዳም እግል ለኣራመው ጀረበው፡ እብሊ ለፈርህው ሚርሐት፡ ምን ኣካን ዲብ ኣካን ዲብ ልዳወር፡ እግል ረክበው ሽቃላይ እብ ሰላም ሌጠ እግል ሊጊለ ዐጀሉ፡ ለትከሰት ምኑ ህይ ፈጅራት እንዲ ጌሰ እግል ልሰኣል ዲብ ለኣፍህጥ፡ ምን መክተብ ትራፊክ አሰክ ፋርማቲያ ሐማሊን፡ ምኑ አሰክ ማይ አበሻውል ወጀዛረት (ማቼሎ) ክምሰል በጽሐው፡ ናይ አሰመረ ቃእድ ፖሊስ ማጀር ጎይትኣም ጉብረዝገሊ ለትጸዕነ እት ማትረፍሰ ለጸብጠት ጂፕ እት ተሐልፍ ረኣው፡

“ለቲለል አትፈክሬኩ” ልብል ጸጋይ ከሕሳይ፡ “ጎይትኣም ትርሺ እንዲ ጸብጠ አሰክ ኣዶቱ ለገደሰ? ዲብ ንትባህል፡ ዲብ እሊ የም ሽል ዐቅብ ህይሌ ለብኡት እት ወክድ ለህይ ኣካን ኖረት ለዐለት ክምሰል በጽሐነ ዘብዋ ሰምዐ፡... ዲብ አዳምቱ ሚ ለዐል ምሰሉም ይዐል፡ ላኪን ለዘብዋ እት ልትደቀብ ጌሉ፡... በርሄ ወዘመክኤል



እግልዬ ቤቼ እምቡጋልያኖ እንዲ ኣብጸሐው እት ለኣቀብሎ ባት ካርቸሊ ክምሰል በጽሐው... ምሰል መኪንቶም ካዘርመ መተላኢ እንዲ ኣብጸሐው አሰረምም፡”

ባት ሳዕት ሐቱ ናይ አደሐ እግል ጸጋይመ እንዲ አሰረው ጅማዐቱ አትዐረው፡ አሰክ አረቡዕ ሰኣል እንዲ ኢልትቀደም እቶም ወእንዲ ኢልትሐረት ጸንሐው፡

እሊ ክኣነ እት እንቱ፡ ለዘብዋ አሰክ ኣትኒን ምሴ ኣተላላ፡ ምናተ ለእብ ሰበቡ ለትፈንጠረው ሽቃለ እት

ኖሰኖሶም እብ ኣትሐላላፋው ለኣይክ ፈጅራት እንዲ ተኣክበው ሓለትላ እሱራም ለዐለ ሚርሐቶም በህለት ጸጋይ፡ በርሄ ወዘመክኤል እግል ልድለው ሰባት ዋፈቀው፡ ኣተሉት እሰቡሕ ምን ሐዲሰ እት ድዋራት ከረሰት ማርያም ተኣክበው፡

ዲብሊ አምዕል ለሁ፡ እግሩ እንዲ ትዘበጠ እግል ዲመ ለመሰከነ ሁብተማርያም የሃንሰ እሊ ለተሌ ዝክርያትላ ሐደሰ ለህይ ህለ እሊ፡

ኣተሉት እንዲ ትጀመሪ እት ቀደም ከረሰት ማርያም ለህለ ጋድም እንዲ ትገሰኑ ቲለል አሰራንን ትሰኣል፡ ትፈንጠሮ እንዲ ትባህል፡ ክምሰል አቤ፡ ሰብ ፈረሰ ላቶም ፖሊስ እንዲ መጽእው እብ መረዊ ወኣፍሩሰ ዲብ ዘብጠ ወዳርኩ ፈንጠረው፡ ኣነ ጀህት ሰዩም አለመኖህ እንዲ ሀረብኩ አሰክ ቤቼ እግል እጠዩ እት ሐሰብ ማጀር ጎይትኣም ወገሌ ቱልየቱ ዲብ ጂፕ እንዲ ጉብኡው ዲብ ዘብጠ እትነ ረኣኤ፡ ሐቱ ርሳሰ እብ ረኣሼ እንዲ ሐልፈት ብክ ክምሰል ሽወጠት፡ “ኣነ ሚ እግል ትሕደግ እቼ” እንዲ እቤ ሽክት ባር ሮመ ሀረብኩ፡... ላኪን ሐቱ ርሳሰት እግርዬ ሰባት ረክቡት፡ ዲብ ወደቅቱ፡... ክልኣት ብዕዳምመ ምሰልዬ ትዘበጠው ... ማርቼድሳት እንዲ መጽእየ እግል ሰልሲትን አሰክ እስብዳልየት ነሰኢዮ፡... ዲብ ጉብረሳላሴ ጃምሶ ለልትባህል ምሰል ምር እብ ክቡድ ለተሐከረ ሐሸላ ለልቡሉ ተሓበረው እትኤ... ምኒ ለሞተ ይዐሉ፡

እብ ሰባት ብዝሐ ናይለ ሞተው ብዘሕ ዋዴሕ ኢኮን፡ ለትፈናተ ዴማት ክመ ለህይቡ ለዐሉ ዕልብለ ሞተው ምን 9 አሰክ ምእት ለበጽሐቱ፡ እብ ዋዴሕ ኣክል እሊ ሞተው አው ክምሰል ገሌ ዴማታት ለልብሉ፡ ምር ከማን ኢሞተ ለልብሉ ደለል ሳብት ወሐብሬ ላኪን እግል ንርኩብ ኢቀደር፡

ዲብሊ ኣዶም ለህይ ላኪን፡ ቀድሞት ማይታም አሰፍ ድቁብ ካልቅ ክምሰል ዐለ ለለኣፍህም ሰላላይ ሐብሬ ህሉ፡ እሊ ለተሌ ንርኤ፡

ማሌ አምዕል፡ ፖሊስ ለለኣክሌዕ ቀናብል ወሰለሕ እግል ልትነፈዕ ሰባት ትቀሰበ ዲብ ክልኢቱ ጀህት ሐክር ሰዱፍ ህሉ፡ ትጃር እሰላም ብዝሐ ማይታም ወመጀርሒን እንዲ ኢተኣመረ ደካኪኖም ክምሰል ኢከሰቶ ኣትኣመረው፡ እሊ ለበለው እቡ ሰባቱ እብ ሰዩሲ መሐመድ ዑመር ቃዲ እንዲ ትመክረው፡ ምድልሰ ቅራን እዲህ እግል ለኣቱ ሰባት ሐሰበውቶም፡



ሐሊብ እም፡ ዓማት ሐዮት ወዳበሮት

ክም መምሬሕ ውዛረት ዓፍዩት ጅን ውልድ ክም ቤለ ዲብ ቀበት ሰር ሳዐት እት ጥብ እሙ እግል ልትጸበጥ ወምን ሸቢቀ እግል ልትሰመል ሀሌት እሉ። እሊ ሀዩ ዲብ ዕያዳት እግል ወልደ ሌጠ ለኸሰሰ ኢኮን። ምን ኣመረ እብለ ገብአት ምስምስ ግድዐት ክድመት ዓፍዩት ምን ቀሰበተ ልግበእ ወጅነ ምን ሸፍገዩ እት ቤት ለትወልድ እምመ ምን ገብእ ለጅነ ትትከበት እምልድ ወምስለ ለሀየለ ፈተት ወቅሩብ እግለ ሐራሰ እት ቀበት ሰር ሳዐት ጅናህ እግል ተአጥቤ እግል ለአትናይታህ ዋጅብቲ።

እሊ እግል እም ምንገብእ ወውላደ ምኑመ እንዴ ሐልፈ እግል ሙጅተመዕ መንፈዐት ሰኒ ዐባይ ብእቲ። ለጅነ ኣጊድ ጼነ እሙ ለአምር ወፍንጌህ ወእሙ ለሀሌት ፈተ ምን ኢነት ለህ ቅርድ ሕጡጥ እግል ትውዴ ተአነብት። ለጥብ ክም ትጠበ ኣጊድ ለሐሊብ ለአቀዘር ሆርጥናት እንዴ ትቀሰቀሰ እም እግል ጅናህ ሐሊብ እግል ትድረር ሰዴ። ለዶል ለነሰኦ ሸቢቅ ሀዩ እግል ሐዳሰ ሰርዐት ሓቀቀት ነብረ ምን አፍ እንዴ አንበትክ አሰክ ከርሸት ወአምዓይት እንዴ አትሓመለዩ ምን ለገብአ ለለኣዜ ጀራሲም ወሓጃት ብዕድ ወርዶ። እብለ ሀዩ እት ዐለም ለለኣነብተን ደቃይቅ ሰልፋ እብ ራሐት ወሰዓደት ለአነብተን።

ላመ እም ምን ሰድት መደት መሐጽ እንዴ ትፈረጀት ውላደ እት እዴህ እንዴ ትክበተት እት ሕቅፈ ወጥበ ትጽብጦ ዲብ ሀሌት ክለ ለመጸእት እንዴ ትረሰዐት እብ ለውቀት ወሐናነት ትሸዕር። ጥብ ጅነ ክም መግመገዩ ሀዩ ለርሕም እግል ልትጨቀም ወእት አካኑ እግል ለአቅብል ለአናብት። ከጥባይ ምን ምዕል ሰልፍ እግል እም ወውላደ እብ ሸዑር ለለአትጽብጥ፡ ገበይ ዓፍዩት ለፈቴሕ ወሐንገል ጅነ ለልሰሕል ህያብ ረቢቲ።

እብ ዕን ሙነት ረኤናሁ ምንገብእ ጅነ ሐሊብ እሙ ለሐሰት ልትዓደለ ለአለቡ ሙነቲቲ። እለ ጠቢዐት ኖሰ ለአዳሌተ እሉ ሙነት እብ ተአሰትህል ረክበዩ ምንገብእ፡ ዮም ክም ጅነ እግል ልዕቤ ወፈጅር ክም ሰነት አዳም እግል ለአውቄ አሳሰ ዐቦቱ ወፈሳሐት ሐንገሉተ። እግልሚ ምን እንብል ጠቢዐት ኖሰ እግል እት እድንዩ ሸብብ ለሀለ ንኡሻይ ሐዲስ እንዴ ትቤ ለአዳሌቱ ምስለ ደረጀት ዐቦት ገርቡ ለናሱቤ ምስል መቅደረት ሓቀቀት ነብረ ናይለ ጅነ ለትመሳኔት፡ ክለ ደለ እግሉ ተአትሐዜ ሙነት አው መቀዝያት ክም ከረ ፕሮቲን፡ ካርባሃይድራይት፡ ሸቤሕ፡ ሺታሚናት፡ መዓድን ክም ከረ ሐጺን ወካልሰዩም መሰል ለክምክምቲ። ህቲ ሌጣመ ኢኮን!

እሊ ንኡሻይ ዲብ እለ ዐለም ሐዳሰ መጽእ እት ሀለ ለአምሩ ለኢነብረ ሻይረሳት፡ ባክቴርያታት ዕሳሳት ወህቲ ለጸውሩ ገርብ ለክምሆ አሸያእ ምኑ ምልእት ምን ገብአት፡ ምን ክሉ እሊ እግል ልዳፊዕ ሐሊት ለለሀይዐ ዝሕሮታት ሀለ ዲቡ። እበ አፍ ውልደቲ ሸነብኡ እንዴ ተአረረ ኒሞንዩ እግል ኢትርከቡ፡ ረክሰ እዘን እግል ኢለትቀባብሉ፡ ለትፈናተ ሕማማት ሰርዐት አተንፈሶት ወፍጋር እግል ኢልርከቡ፡ ሐሊት ምን መዳፈዐት አምራድ እግል ተሀሌ እሉ ሐሊብ እም ሰኒ ለአትሐዘዩ።

ሐሊብ እም እግል ራክብ ውሓግል እግል ክሉ ጅነ አክል-አሕድ ለአትሐዘዩ። ዲብ እሊ ብዙሕ ምን ሸዑር ዐለም እብ ድብር ወሕግላን፡ እብ ነዐር ወአከይ መቅሬሕ እት ሓሰት እኪት ለሀለ ዲቡ ዘበን ሐሊብ እም ለምር ወሐይዐ ለኢትረከበ ዓማት ሀለዮት ወአከዶት ዐቦት ናይ ጅነ እት እንቲ ርክብ ሀሌ። እም እትለ ትሰደደት ሓላትመ ዲብ እንተ አሰክ እብ አርወሐተ ሀሌት እግል ጅነ ምን ሐሊብ ዲብ ተሐንኩ ለመራር እግል ለሓልፈ ህተ ዲብ ተሐልፍ እሉ እት ዕልብ አዳም እግል ልትሓበር ለተአቀድር እበ ሙነት እሊ ሐሊባቲ።

ሐሊብ እም እግል ክለ ወላዲት ለተሀየበት ንዕመት ውላድ ምንማተ፡ ክል ውላድ እበ ተአሰትህለ እግል ልርከበ ቀድር ሀለ በህለት ኢኮን። እብሊቱ ለሕሰር ሙዝመት ዓፍዩት እዲነ አክሎም እዩሳም እግል ልትሀየበ ለአሰተሀለት። እብ ሰበት ዓፍዩት እም ወጅነ ወመትቀራራብ እም ወጅነ እግል ወላዲት ክምስልሁመ ምስለ ለሀለው አዳመ እግል ልትሀየብ ምህምቲ። እሊ እብ ዶልዶሉ ዲብ መአሰሳት ዓፍዩት፡ እዕላም ውበዕድ አግቡይ ተድሪሰ ለገብእ አትፋዝያት እብ ምልሃሁ ዲብ መካይድ ናይለ ሙጅተመዕ አሳሰ እንዴ ከረ ክም ሰቃፊት እንዴ ሰብቀ ጅነ ዑፋይ፡ እም ዑፊት ወሸዑብ ዕጹም እግል ለሀሌ እነ ለሰዴቲ። ሰበት እሊ ለገብአ መዋጥን ምን ቤቱ ወዕያሉቲ እንዴ ትበገሰ እት ክሉ ደዋሒሁ እም



ጅናህ እብ ጥበ እግል ተዓቤ ለተአቀድረ ሓላት እግል ትጥፈሕ ግዴቱ እግል ሊዴ ሀሌት እሉ።

እድንያይት መዝመት ዓፍዩት እት ሐልፈ ርቡዕ ዘበን (26 ሰነት) ዲብ ሰነት ሐቲ ሳምን እድንያይት ሳምን ሐሊብ እም ክም ትፈቀድ ወዴት። እብ ዶልዶሉ ለፈቅዳህ ድወል ሀዩ እት ወሰከ ገደሰ ሀለዩ። ዲብ ኤሪትሮየ እለ ሳምን እለ እግል ትፈቀድ ምን አንበተት እላተ 22 ሰነት አዶረት። ምን ሄለል አጎሰት አሰክ ሰቡዕ አጎሰት እት ክለ ወጠን ትዘከረት። ዲብ አቅሊም ምግብ እት 03 አጎሰት 2018 ዲብ ምዴርየት በራኽ እንዴ ትፈቀደት ወዐለት። እተ ምዕል ለትፈናተ ልእኮታት ትቀደመ።

ምን ኤሪነ እበ ረክብናህ ሐብሬ፡ መሰኡል ፈሬዕ ውዛረት ዓፍዩት አቅሊም ምግብ፡ ዶክተር ተሰፋይ ሰለሙን ዲበ አሰምዐዩ ከለመት፡ እብ ደረጀት ወጠን 98% እማት ውላደን እብ ጥበን ክም ለዓብዩ አከደ። ክል ሰነት ዲብ ወሬሕ አጎሰት ለትትዘከር እድንያይት ሳምን ሐሊብ እም፡ አህምየት ወመንፈዐት ሙነት ጠቢዐት ዓሉቅ እግል ትትአመር ለአመመት ክምተ ሀዩ ሸርሐ።

ሐሊብ-እም፡ ምስል ዕልም ሙነት ወደማነት ነብረ ዕላቀት ሰበት ቡ፡ አውለውየት እንዴ ተሀየበ ፈሀም ሙጅተመዕ እብ ዓመት ናይ እማት ሀዩ እብ ፍንቲት እግል ልዕቤ ልትከደም ክም ሀለ ዶክተር ተሰፋይ እብ ተውሳክ አትፋቀደ።

ወኪል መክተብ መዝመት አጀኒት መዝመት መጅልስ ቅራን(ዩኒሴፍ) ዲብ ኤሪትሮየ ዶክተር ጆፍሪ አካዬ ሀዩ፡ ከመ ከደማት ዓፍዩት ሐቅ ክሉ መዋጥን ክምቱ እንዴ ተአከደ፡ ዲብ ክሉ እግል ልብጸሕ ልትከደም እግሉ ለሀሌ፡ ሐሊብ እም'መ ለኢትንጽፍ ፍቲ ለትትረከብ ምኑ ወደማነት ዓፍዩት ወዐቦት ለትትሐፈዝ እቡ ሐቅ ናይ ክል ጅነ ክምቱ አብርሀ።

ወኪል እድንያይት መዝመት ዓፍዩት ዲብ ኤሪትሮየ ዶክተር ቴድሮስ ተከሰቲ እብ ጀሁቲ፡ ክሉም



አጀኒት እበ ትትቀድር ተ አሰክ ክልኤ ሰነት ለአደውሮ ሐሊብ እምም እግል ልትመወኖ ክም ወጅብ ሐበረ። ለናይ ጥባይ ነባሪነ ሰኒ እግል ልትሐፈዝ ወቀደም እግል ልሄርር ሀዩ ትፋነ።

ፊን እግል ተቅዩር ለሐሰ መትሻቀዩ ምን ገብአ ለምዕል ጅነ ሐሊብ እሙ እት ጠቤ እግል ልዕቤ ለለትናይት ወአህምየት ሐሊብ እም እበ ሸሬሕ በራምጅ ፊን እሸብርቅት ዐለት።

እትለ ሳምን ሐሊብ እም ክል ሰነት ለትፈናተ ሸዓር እንዴ ተሐረ፡ እት ጥባይ ለሀለ መዐናቅፍ እንዴ ትፈረገ ሐል ለረክብ እቡ አግቡይ ክም ልትናቀሸ ወሐል ለወዴ አግቡይ እግል ልትረኤ እሉ ገበይ ትትሐበር።

ዮም ዓመት “ሐሊብ እም አሳሰ ሐዮት ወዓፍዩት” እት ሐንቲለ

ትብል ሰቅራት ለትፈቀደት ሳምን ሐሊብ እም፡ እንዴ ትፈቀደት እግል ትሕለፍ ሌጠ እንዴ ኢገብእ፡ ጥባይ እብ ተአሰትህል እት ፍዕል እግል ልውዐል ለሰዴ ገሌ አሰክ ፍዕል ለነትል መባደራት ነሰእ ክም ለአትሐዜ እትፋቅድት እግል ትግበእ ትትሰኤ። ሀደፍ ክሉ ለአሸቃል፡ ለእበ መናሰበት ልትሀየብ መንፈዐት ሐሊብ እም ለኸሰሰ ኔፍዓይ ሐብሬ ሀዩ ዲብ ክል ቤት ወክል ዕዱ ሙጅተመዕ እንዴ በጽሐ ሙጅተመዕ ምን ኣመሮት ሌጠ እንዴ ሐልፈ መባደረት እግል ልንሰእ እብ ዕጹፍ እግል ልትሸቄ ለለትባሰ ቲ። ጥባይ እበ ኸሰሰ ለሀለ እነ ለልአሸንን ነባሪ እንዴ ተሐፈዘ እግል ልንበር ወምኑመ ወኪን እግል ልትጠወር ክልነ ሕበር እግል ንክደም ውዛረት ዓፍዩት ትላኪት።

ፊን ሳምን ሐሊብ እም

- ዕንዳይ ወሕንጢት ምን ከብድ እምም ክም ፈግረው እት ቀበት ሰር ሳዐት ጥብ እምም ክም ጠቡ ኒዴ
- ጥብ ሐሊብ አሰክ ደርር እንዴ እንቤ እግል ዐልቀት ማይ ሰከር ልግበእ ውበዕድ ለሙሽ በታተን ኢህብ
- ጅነ አሰክ ሰስ ወሬሕ ለአደውር ሐሊብ እሙ ሌጠ ልትመወን።
- ሰስ ወሬሕ ክም አዶረ ወሱክ ነብረ ለአንብት
- ወሱክ ነብረ ኢትደንጉሩ ወኢትቀዱሙ፡ ቀደም ሰስ ወሬሕ እምበል ሐሊብ እም ለጅነ ማይመ ልግበእ እት ወሱኩ ሕጉዝ ኢኮን።
- ሰስ ወሬሕ ክም አዶረ ሐሊብ እሙ በኑ ለእለ ቀዝረ ምን ቀዝር ኢከፍዩ
- ጅነ እተ እለ ሐዘ አካን ወኢነት እግል ልጥቤ ሐቁ ሰበት ገብኡ፡ እም እሊ ሐቅ እሊ እብ ከፎ ተአተምም እሉ ገበይ አጥፍሖት ብትር ሹም ወሰዑርተ (መሰኡልየት) ክል መዋጥንተ።



አሳር

አሳር ቅዱም መትባዳል ተጃረት አግዳም በሐር ቀየሕ ኤረትርየ



አብርሃም ዘርአይ

ቅዱም አሳር ቅብለታይ ክፈል ቀር አፍሪቀ እግል ናይ በዲር መዐደይ ሕዱድ ወራታት ተጃረት ለልአፍህም መሰል ሰኢ ለገብእ እሰባታት ጽብጥ ህለ። አግዳም በሐር ቀየሕ ኤረትርየ እግል እሊ አሳር እሊ ለወዴሕ እሰባታት ጽብጥ እብ ህለዮቱ። ምህመቱ እብለ ፅን ትርድት እግል ልትርኤ ቀድር። እስትራተጅያይ ክጡጥ በሐር ቀየሕ፡መግባይ በሐር፡ ወምሒጥ ህንዲ፡ እግለ እትሊ አግዳም ማያይ ክፈል ለዐንበባይ ሰልጠናት ቅዱም፡ እቱ ለአሰረ እብ ግብአቱ፡ እትሊ ሰልጠናት እብ ፍንቱይ እት 1ይ ክፈል ዘበን ቀደም መትወላድ አሰክ 1ይ ክፈል ዘበን ግረ መትወላት ነብየለ ዒሰ ለትረክ ወራታት ተጃረት መዐደይ ሕዱድ እግል ልኣትናይት ቀድረ።

እት ሰልጠናት እሊ ማያይ ክፋል እበ ገብኦ ለትፈናተ ብሐሱ ለትረከበ አሳር፡ መፋሂም ባሕሲን ፅሉም አሳር ቅብለታይ ክፈል ቀር አፍሪቀ ህቱ ሰበት መርብዩ ፈተሾቱ ለኣትሐዜ። እብ አሳሰ እሊ መትጸባጥ ምስል ድዋራት እሊ አሳር፡ አሰእለት ብዞሕ ለልሀርሰ ጋር ምንመ ገብእ፡ ሸክል ወጽበጥ ፅሉም አሳር ቅብለታይ ክፈል ቀር-አፍሪቀ እንዴ ታዩን መትመዳድ ወርሕብ እትሊ ለትሰመ መራሕል ታሪክ ለትረክ ወራታት ተጃረት መዐደይ ሕዱድ፡ እሊ ክፈል ዐለም እሊ ምስል አቅሊምያይ ወእድንያይ ሰልጠናት እግል ንርኤ ሰዴነ።

እሊ መፋሂም እሊ አሳሰ እንዴ

ወዴነ፡ እት አግዳም በሐር ቀየሕ ኤረትርየ ለትረከበ አሳር ምህመቱ እት መርበዮት ወራታት ተጃረት መዐደይ ሕዱድ እግል አቅመቶት እሊ ክቱብ እሊ ዱሉይ ህለ።

አግዳም በሐር ቀየሕ ኤረትርየ እብ ዓመት፡ ቅድምት ሚነት አዱሊሰ ህዩ እብ ፍንቱይ እት መርበዮት አቅሊምያይ ወራታት ተጃረት መዐደይ ሕዱድ ወፅላቀት ቅብለታይ ክፈል ቀር አፍሪቀ ለተልሀዩ ዶር፡ ሸከረት እሊ ቃርብ ለህለ ክቱብ እት ገብእ፡ ፅላቀት ቅዱም ወራታት ተጃረት መዐደይ ሕዱድ እሊ አቅሊም እሊ እብሊ ለተሌ ተፋሲል እግል ልትሸረሕ ቀድር።

ሰጅል ቅዱማም ምስርዩን እተ እብ ምድር ፑንት ልትአመር ለዐለ አቅሊም፡ ድቁብ ናይ ተጃረት አትአመርት ዋድያም ቶም። ለእት ቅዱም አቅብር ቀዳምያም ምስርዩን ሰጅል ለህለ እት ወክድ መልከት ሃትሸፕሱት ለገብኦት አትአመርት ተጃረት ዝያድ ለገብኦ ለልትርኤ ወእት ቅዱም አሳር ውሱቅ ለህላቱ።

እሊ እት ደንጎበ 3ይ ክፈል ዘበን ቀደም መትወላድ ዒሰ ወሰልፍ 2ይ ክፈል ዘበን ቀደም መትወላድ አሰክ ምድር ፑንት ክምሰለ ተሀደገ አትአመርት ምህመቱ ቅዱም መትጸባጥ ግብለታይ በሐር ቀየሕ ምስል ቅብለታይ ክፈል ቀር አፍሪቀ ምስል ሰልጠናት ኒል ለልአሸር ቱ። እሊ መፍሁም ፅሉም አሳር እሊ እግል ወክድ ረዩም እግለ እት ድዋራት ተጃረት ለህለ

መትጸባጥ ጆግራፍያይ ሕዱድ ምድር ፑንት እንዴ ኬደ ለትጠወረ ሕሳባት ወአፍካር ክምሰልሁመ ተሐሊላት ሐለት ለህባቱ። አሰክ እሊ እትሊ ወክድ እሊ ለትበጽሐ ብሐሳት አሳር ወሕፍዝ ፅሉም ሐያት (molecular biology) ክምሰለ ለሐብሩ፡ለበዝሐ ክፋል አግዳም በሐር ቀየሕ ኤረትርየ አሰክ ምውዳቅ ጸሓይ ቀላቅሎታት ምድር ፑንት ክም ዐለ ወዴሕ። እብ አሳሰ እሊ መፍሁም ምህመት አግዳም በሐር ቀየሕ እት መርበዮት ወራታት ተጃረት መዐደይ ሕዱድ እመር እት ገብእ፡ ቅድምን እሊ ፅላቀት ተጃረት እሊ እት አግዳም በሐር ቀየሕ ኤረትርየ ለዐንበባ ሰልጠናት እት ወድሖት ለገብኦ ብሐሱ አሳር ዶርም ዐቢቱ። ቅርድ ሰልጠነት ቀዳሚት አዱሊሰ ምስል እሊ እት ለዐል ለትሀደገ ወራታት እብ ዐቢህ ለትትሰሚ እት ትገብእ፡ ለትወቀለ ሰልም ዐቦት እሊ ቅድምት ሚነት ምን 1ይ ክፈል ዘበን ቀደም መትወላድ አሰክ 1ይ ክፈል ዘበን ሐቆ መትወላድ እብ ግብኦቱ ህዩ እግለ እትሊ መርሐለት እሊ ለዐለ ወራታት ተጃራት ለህለ መትጸባጥ ለወዴሕ አሳር እብ ታዩኖት ቅብለታይ ክፈል ቀር አፍሪቀ ምስል ፋይሕ ክፈል ሰልጠናት ምግባይ በሐር ወምሒጥ ህንድ ለዐለ እግሉ ወራታት መዐደይ ሕዱድ ወመትጸባጡ እግል ንርኤ እንቀድር።

እት ክፈል ዐለም ለትረከበ ቅዱም አሳር እግል መትጸባጥ ወተአሲራት ናይ ለትፈናተ

ምን ዐድ ህብቱሰ አሚር ወድ ገበህ ዐሊ ጃንጌ ወድ ሕመድ ድራር ለልትበህል ካልያይ ምን ሐባብ ዐድ ህብቱሰ ለሐለየ ሕላየት እግል ንርኤ። ዐሊ ጃንጌ ሀርማይ እንዶ ዐለ ሐር እት ዘበን ጢላን ዐድ አተ ወአበረ። ከሐቱ ምዕል እግል ዎርት ምን ውላዱ እብ ሀውት ዲብ ምዕጥን አውረደዩ። ለወልዱ ህዩ ማዩ እንዴ መልኦ እት ፈግር፡ ሰብ አሰፈደ ትክበተዎ። ከትሰኣለዎ “እናሰ አዩ ምድር እንተ?” ቤለዎ። ህቱ ህዩ ወድ ዐሊ ጃንጌ ወድ ሕመድ ድራር አነ” እት ልብል በልሰ እሉም። ህቶም ህዩ፡ “ሕጻን ካይን ወዛልም ወሳርቃይ ገብኦክ ከማ” እንዶ ቤለዎ ለማዩ ሰተዎ ምን። ወሐር ለሕጻኑ ክም ደግመ እሉ ዐሊ ጃንጌ እሊ ሕላየት ሐለ።

ካልብኝ ጃለለት ትፈዴት ዲብኝ አሰፈደ እሊ አድም ዝላማ ቱ ለዲብ ለረኣሰኝ በረጃ ክሰእት ላተ ምን ዔረት ወዳይረት ላተ ምን ክሰኦ ምን ሐርደ ሲጋሁ ምን በልዐ ወሐሊብ ማሉ ምን ሰተ ከረ ሰሊም መስምዳይ ለባትኩት እብለ መንፈሰ ዮም ሰሊም ምን ጸኔሕ እት’ለ ሐቲህ ወወደ ነፍሰኝ ሐወነት ወኢእንረቴፅ እብ ሸክ ግሔትመ ክሌሕ ዲብ ትወዴ ዙብጦ ዲብ ደምቀተ ምን እሊ ለእሊ ትገበኣኝ አልጃቶ ሐመድ ወመጽኦ።

ሰልጠናት ለልሐብር ቱ። እሊ አሳር እሊ ህዩ ክም አሸቃል ከላት (pottery)፣ታቁሽ እበን፡ መሻቀዩታት ሐጺን (metal objects)፡ ግዝ (glass) ውበዕድ እት ገብእ፡ ቅርድ እሊ አሳር እሊ(origin and production) ወመትመዳዶም (patterns of distribution) እንዴ ፈተሸና እት ፍንጌ ለትፈናተ ሰልጠናት ተኣሲሩ ወመጸባጡ እብ ሐድ እግል ፍሂም ሰዴ። እት አግዳም በሐር ቀየሕ ኤረትርየ እብ ዓመት እት ቅድምት ሚነት አዱሊሰ ህዩ እብ ፍንቱይ ለትረከበ አሳር ቅዱም ህዩ ምስል እሊ እበ ልትመሳሰል እግል

ንርኦዩ ለኣትሐዜ። እት ቅድምት ሚነት አዱሊሰ ወአግዳም በሐር ቀየሕ ኤረትርየ ለትረከበእብኣምፎራ(amphorae) ለልትአመር አሳር አሸቃል ከላት ዎርት ምን እሊ እት ለዐል ለሰሚናሁ መትጸባጥ ለአፍህም። እሊ አሳር ከላት እት ሰልጠናት ሮማ ወግሪክ ፈሩ ለዐለው ክም ቶም እሰባታት አሳር እት ገብኦ፡ አሰክ ግንራራብ ፖርቱጋል፡ ሲፓንዩ፡ ብሪግንዩምግባይ ምፍጋር ጸሓይ፡ አቅሊም ምግባይ በሐር ኤጅያን ክምሰልሁመ ቅብለታይ እንክር ቀር አፍሪቀ ፈሩ ክም ዐለው ወሳይቅ አሳር ለሐብር። እብ ፍንቱይ አሳሰ ወመትመዳድ ለእብ ሰልጠነት ሮማ ፈሩ ለዐለው እግል ለትፈናተ መራሕል ለወክሎ ሰበት ገብኦው፡ እት ሕመረት እሊ ሰልጠናት ወግራሁ ህዩ እት ለበዝሐ ክፋላት እስትዕማር ሮማ እብ ብዝሐ ልትሸቀው ክም ዐለው ልትአመር። እሉም ክም መጽበጢ ዜድ ኃቢት እብ ዋጅብ ለትጸበጠው ዓሳታት ወተመር ጽብጣም ለዐለው ምን ከላት ለትሸቀ መሻቀዩታት መትጸባጥ ሰልጠነት ሮማ ምስል አቅሊምያይ ወእድንያይ ሰልጠናት እብ ለትፈናተ መጃላት ወክል። እብ አሳሰ እሊ እትሊ ለትፈናተ መራሕል እሊ ሰልጠናት ለትሸቀው ኣምፎራታት፡ እሉም ምን ከላት ለልትሸቀው እብ ባሕሲን ፅሉም አሳር ለትፈናተ አሰማይ ልትሀዩሶም። እሊ አሰማይ እሊ ህዩ ቅርድለ ሸቅል ወመትመዳዱ ወክሎ።

ልተላሌ...



ሸባብ



ሕዱግ ሰሌማን

እት ቅንጽት ለህላው ሸባብ ወሻባት ፍንጌሆም ወፍንጌ ምጅተመዕ ለህሌት ዕላቀት ሰኔት ወእብ ፍንቱይ ዋልዴኖም ክምሰለ ትትሐዜ ኢኮን እሊ ለጉበእ እቡ ሰቡብ ብዙኡ ምንመ ጉበእ፡ ለአግደ ላኪን ለሸባብ ወላ ሻባት ምን ንእሸት እት ሸንግላት ሰበት ልትዕደው ጠባይዕ ሐዲስ ሰበት ጠውሮ ወለምጅተመዕ ሰበት ኢልፍህም ቱ።

እሊ ጠባይዕ እሊ ህዩ እብ ዋልዴን ወምጅተመዕ ኩቡቱ ሰበት ኢረኩብ እት ፍንጌ ክልኢቶም ኢመፋህመት ትትከለቅ። ከእለ ጋሪት እለ እግል ባልሐት እሎም እት መትዕዳይ ሸባብ ለህላው ሸባብ ወሻባት ምንእንእን ሚ ለሐዙ ለልብል ኦርእስ እንዴ ሀረሰን ለህሌት ኢመፋህመት እግል ባልሐት ምህመት እት እንተ ሰበት ረኩብናህ፡ እግለ እትሊ ዕምር እሊ ለህላው ሸባብ ወሻባት ምጅተመዕ እግል ልፍህመክምቱ ለትሐዙ ጋር ሚት እንዴ እንቤ ስኡላም ዐልኑ።

ሸባብ ወሻባት ዓማርም ምን 14 ወልዐል ዶል ጉበእ ቱ ፍንቱይ ጠባይዕ ለልኦመጽኢ እትሊ ወክድ እሊ ለሻብ ኣው ለሻባት እት ጠቢዐታይ ክልቀቶም ገሌ ተቅደራት ለኦመጽኢ ብሉቅ በሀለት እግል ውልደት መትዳላይ ወመቅደረት ገሮብ እንዴ ዓበው ሐለት ወጣቀት ለዓቡ፡ እብሊ ህዩ “እነ ምን

ኣክልዩ” ለልብል ጠባይዕ እንዴ ጠውረው ለጉበእ ነፈር ወሂገ ክም ኢሰም ለወድኖም ፍዋር ሐዲስ ለኣነብቱ።

እሊ ለርአው ዋልዴን እግልሚ እግልን ኢሰም ወኢጠይቦ እንዴ ቤለው ምስሎም እት መሻክል ልትከረው፡ እሊ ለጉበእ እቡ ሰቡብ ህዩ ለጅን ንኡሽ እት እንቱ እግል ዋልዴን ልትለኣክ ወሰምም ሰበት ዐላ፡ ለናይ ቦዲር ሕንቃቂሆም እግልሚ ይእንረክብ ሰበት ልብሎ ወለ እት ሸበት ለትዕደ ጅና ኣው ወለት ህዩ “ምን እሊ እስትዕማራቶም ፈገርኩ ሕርየት ኖስ ዐለንኩ፡ ኣዜ ምን ነቅመኒ እብ ሐለት ልግበእ ወእብ ፍክር ኣክልዩ ኣለቡ” ለልብል መፍህም ሰበት ጸብጦቱ። እለ ጋሪት እለ እበዩ እግል ትትባለሕ ትቀድር መሰለኩም፡ እሎም መንደሊታት እሎም እት ሐያት ሐዳስ ምን ልትዕደው ወእሎም ዋልዴን እሎም ህዩ “ኣጀኒትነ እግልሚ እግልን ኢሰም” ምን ልብሎ ምስምስ እንዴ ትብገሰው ኢሰካበት ሸፍር ክልቁ። እለ ጋሪት እለ እግልዬም ክል ዶል ተኣትሐሰብኒ ዐለት፡ ከኣሰልፍ ለፈርግ ፍንጌ እሎም ክልኦት ግም ለህለ እግል እድሌ ምስለ እት ዕምር ለህላው ሸባብ እንዴ ኣምሐበርኩ ምሸክለቶም እግል እድሌ እንዴ እቤ ምርት ሰኣል እንዴ ትሰኣልኩምም በሊሶም እግል እድሌ ጅሩብ ዐልኩ።




እት ሸበት ለልትረከቦ ሸባብ ምኒን ሚ ለሐዙ?

ለሰኣል “ምጅተመዕ ሚ እግል ልፍህመኩም ተሐዙ” እንዴ እቤሎም ስኡሎም ዐልኩ፡ ህቶመ እትሊ ሰኣል እሊ እሊ ለተሌ ረኣይ ሀበውኒ።

ለሸባብ ምስል ዕምር ለመጽእ ሐዲስ ጠባይዕ ለኦርኡ፡ እግል መሰል እት መባትክ ገርቦም፡ እት ንዮቶም ወሓዚሆም ለህለ ተሰርፋቶም እብ ዋልዴን ለኢልትፈቱ፡ መሰለን ለጅን እት ጭገሩ ለልኦመጽኡ ኣሰሉብ ሕላገት፡ እት እደዩ ለወድዩ ካትሞታት እት ሰጋዱ ለወድዩ ሰለሰል ውበዕድ ናይ ግርመት ለልከሰቡ ሰርጎ እብ ዋልዴን ክም መዐየን ወኣከይ ጥባዕት ሰበት ልርእዉ እሊ ምኑ እግል ልኣዘም ለሐዘዉ ወልትሃገዉ ህቱ ላኪን እሊታት ሰበት ረይሐ እግል ልኣዘም ምኑ ኢቀድር እሊ ህዩ ሰቡብ ኢመፋህመቶም ጉበእ። እምበል እሊመ ለሸንጉል እት ከደን ኣትማላይ ወምስል ሰናቱ መትሃጃት ወዘበን ኣብደዮት ለኣነብት እሊ ህዩ ኣምዕል እብ ሪመ ወዶል ዶልመ ላሊ እብ ሪመ እበ ነፍዕ ወለኢነፍዕ ተቀም እግል ሊበል ለኣነብት፡ እሊመ ለዋልዴን ኢፈትዉ እግሉ ወሰቡብ ኢመፋህመት ጉበእ። እት ረኣሰ እሊ ለዐቤት ጋሪት ለጅን ክም በዲሩ እግል ልኡክ እንዴ ቀንጸ እብ ንዮት ፋርሐት ኢልሀደግድግ ወኢልትለኣክ እግሎም እሊ ለወዴ እቡ ሰቡብ ለጅን እሻረት “እነ ግድም ዐቤቱ ምንቱ እግልዬ ለልኣዘዘ” ለልብል ፍክር ሰበት ጠውርቱ እሊ ጅን እሊ እብ ኣትሓላይ ኢጌሰ ምንጉበእ ልትኣገሰ ወምስል ዋልዴን እት መትሀረሃር ለኣቱ ዋልዴን ህዩ ለሀርቆ ከእት ኢመፋህመት ለኣቱ።

ለወለትመ እብ እንክረ ወክደ እት ኣትጋራም ወምስል ምራዩት ለትሐልፋ ዘበን በዘሕ፡ እግል እመ ወኣቡህ ክም በዲረ ኢትሰምም፡ ለበዘሐ ወክደ ምስል ሕላይ ኣፍላም ወጊማት ተሓልፋ፡ ህተመ ክምሰለ ጅን ምስል መሳኒተ እንዴ ኣምሐበረት ወክደ እት ድግም ተሓልፋ፡ እሊ ክሉ ህዩ ዋልዴን ሰበት ኢልትከቦቱ ምስለ እት ኢመፋህመት ልትካረው ወልትበኣሶ።

ከእተ ሰኣልዩ እግል ኣቅብል ብኩም፡ ፍንጌ ምጅተመዕ ወእትሊ ሕፋን ዕምር ለህላው ሸባብ ወሻባት መፋህመት እግል ተህሌ ሚ ለኣትሀዜ ለልብል ሰኣል? ክል ዶል ክል ዕምር ናዩ ጠሉብ ሰበት ቡ ለዐባዩ ወልዴን እተ ዕምርም እንዴ ጉበኣው በደል ልርኡነ ወህቶም ለልከዘዉ ሌጠ እግል ኒዴ በደል ለሐዘኩን እተ ሕነ ለህሌን እቱ ዕምር እንዴ ኣተው እግልሚ ክእነ እንጉበእ እግል



ልፍህመኑ ምንጅርቦ ለሐሴ ቱ እንዴ ቤለው ረኣዮም ከምክም። ከሕነ እብ ከፎ እት ዕምርም እንዴ ኣቱነ እግል ንትፋህም ምስሎም ብኩ፡ እሊ ሰኣል እሊ እግልን ለዋልዴ ወለ ሐው ለዐባዩ ለከሰሰ ቱ መሰለኒ።

እሊ እግል ልግበእ ጉበእ ምንጉበእ እግል ኒደዩ ለብነ ሓጃት ህለ ምንጉበእ ለወለት ወለ ሕጻን ምን በዲርም እትለ ደረጃት እለ እንዴ ኢበጽሖ ኣደብ ሰኒ እቡ ክም ልትረበው ወደዮቶም እተ እንዴ ሐጠጠው ሐቅ ዋልዴን እሕትራም ምጅተመዕ ወኖስ እንዴ ደርሰው ክም ልትነፍዮ ውድየት ለኣውላይ ጽዋር እት ጉበኡግራሁ ዘበኖም እብ ዋጅብ ክም ልትነፍዮ እቡ ውድየት ሕነ እግል ኒደዩ ለብነ ምህመት ቱ፡ እሊ ህዩ ለጅን እትሊ ዕምር እሊ እንዴ ኢበጽሕ እንዴ ኣድረሰናሁ ቱ። እት ምኩ ክም ሰብቅ እግል ኒደዩ ብነ እብ ፍንቱይ ህዩ ለጅን ምስተቅብሉ እብ ድራሰት እግል ለኣክዱ ሌጠ ክም ቀድር እንዴ እት ምኩ ወቀርናሁ እግል ንጽንሕ ብኩ፡ እሊ ጠባይዕ እሊ እንዴ ኣልበሰናሁ ዶል እንጸንሕ እትሊ ዕምር እሊ ለልኦርእዩ ጠባይዕ እለ ኣከ ምን ለኣኬ ምን ገበዩ ክም ኢልኣወልዋ ወድዩ እግልሚ እትሊ ዕምር እሊ ለመጽኡ ተቅደር ጠባይዕ እግል ልጋብህ ሰልኣው ሰበት እንጸንሕ።

ለዐቤት ጋሪት ላኪን ለጅን እተ ናዩ ዕምር እንዴ ኣቱነ ርሕነ እግል ንትሰኣል ብነ እግልሚ ሕናመ እትሊ ዕምር እሊ እት ህሌን ናይነ እኩይ ጠባይዕ እቡ ቀደሞም እግል ዋልዴን እኩይ እርኡያም ሰበት እንጉበእ፡ ኣዜ ህዩ እሊ ዕምር እሊ ሰበት ተዕዴናሁ ወእኪት ወሰኔት ሰበት ኣመርነ ለህቶም ወድዉ ውዳይ እብ ዕነ ዶል እንገንሐ እንዴ ኣደብ ወዓዳት ምጅተመዐነ

ለይሐሸመ ሰበት መሰል እትነ በደል እብ ዕነ እብ ዕንቶም እንዴ ገንሐናሁ ለእግሉ ወዱ ጌጋታት ክም ጠቢዒ እንዴ ሐሰብናሁ እብ ቀልብ ናሰሕ እግል ልትባለሕ ክም ቀድር እግል ንሕሰብ ብኩ፡ እብሊ ህዩ ለጅን ወለ ወለት ክም መሳኒትነ እንዴ ሐሰብናሁም ቀደም እትሊ ዕምር እሊ ልትዕደው እብ ክሰሰ እሊ ኣምር ወእቱ ለሳድፎም ጠቢዐታይ ተቅደር ዶል እንዳግሙ እግሎም ህቶመ እብ ቀልብ ናሰሕ እንዴ ትከበተዉ ለእግለ ንህይቦም ምክር እግል ሊደው ወምን እሊ ሕነ ለይንሐዘዩ ኣከይ ወደዲት እግል ልድሕኖ ቀድሮ።

እሎም ውላድነ እት ሐቱ ኢነት ሸቅል ምሕተረም ወገበይ ራትዐት እግል ልጽበጦ በደል ንሐዘዮም እተ ናዩም ኣምር እንዴ ትከሬነ እብ ገበይ ሃድኣት እለ ፍላን እለ ፍላንት ክእነ ወዴኩመ ምንጉበእ ክእነ እግል ትርከቦ ቱ፡ ሰበት እሊ እለ ምን ትወዱ ለሐይሰ እንዴ እንቤሎም እግል ንትጋሚ ምስሎም ብኩ።

ለእት ሸበት ልትዕደው ለህላው መንደሊታት መንፈዐት ዘበን ወእት ሐያቶም ለቡ ተኣሲር፡ ኣደብ ወመንፈዐቱ ንኡሽ እግል ዐቢ ለሐሸም ወምኑ እንዴ ሰምዐዩ ተጃርብ ሐያት እግል ልክሰብ ክል ከዋውት እት ሐያቶም ተኣሲር ክም በ እብ መሰል ለተሌት ድግም እበ እት ኖኣብዮም ወንኣትፋግሆም እትለ ደረጃት እለ ዶል በጽሖ ምስል ክል ተቅደር ጠቢዐት እግል ልፍህመኑ ቀድሮ። እምበል እሊመ እኩይ ለወዴ ጅን ልግበእ ወወለት በደል ንትናህርም ወእንዛብጦም እብ ንዛም ወእንዴ ቀረብናሆም እግል ንንሰሐም ወንሐብርም ብነ እሊ ዶል እንወዴ ሕነ እግል ንፍህምም ወህቶመ እግል ልፍህመኑ ሰድዮም።

ልግብ

ረዶ ዋልዳይ

ዎሮት እናስ ድግለል ዐለ። ለእናስ ሰለሰ ውላድ ዐለው እሉ ወምሰል እሉም ውላዱ እብ ሕበር እብ ፈተ ወለውቀት ነብሮ ዐለው።

ምዕል ሐቴ ለአብ ሐመ። ወመጠጠቱ ምን ምዕል እት ምዕል እት ወስክ አስክ ሞት ቀርቦ። እሉም ሰለሰ ውላዱ ህዩ፡ ረዳሁ እግል ልንሰኦ አሕድ ልትባደር እቱ ወዎሮትክ “እነ ሀርሱ ወእተንትነ” ልብል ዐለ።

ለምንኣሾም ህዩ፡ “ምዕል ሐቴመ ትግበእ፡ እሊ አቡዩ ክድመወ።

እግልዬ እዘሞ ምኑ ወአነ ምስልዬ ቤቼ እግል እንሰኡቱ ወእግል እተንትነ። ምን ክሉ እግል እትገሴ እሉቱ” ቤለዮም ከትረጃዮም። ዶላ ሰልፍ ለሐዉ አበው እሉ፡ ምናተ ሐር ምን ክለ ሐዞቱ እትለ ሚራሰ ለትበጽሐ እግል ልእዘም እሉም ክም ቱ ዶል ሐበረዮም፡ ዋፈቀው እሉ። ለንኡሽ ኩሉም ሕጻን እግል አቡሁ እንዴ ሀረሰዩ አስክ ቤቱ ነክሰዩ፡ ወምሰል እሲቱ እንዴ ገብአው እት ራዕዉ ወእት ተንቱነ አስክ ምዕል ሞቱ ከድመወ።

ለጅነ ላሊ ሐቴ እት ሰካቡ አቡሁ ረኣ፡ ወእት አካን ሰኒ ረዶም ገሌ ዝሕረት ሓቢዕ ክም ሀለ አሰለዩ። ምድር ክም ጽብሐ ለጅነ አስክለ አካን ለአቡሁ ወስፈዩ እሉ ጌሱ ወዲበ ሰንዱቃይ ንኡሽ ምን ሰርጎ ወማል ለትመለኦ ረክቦ። ለጅነ እግለ ሰንዱቅ እንዴ ሀረሰዩ አስክለ ሐዉ ጌሰ እቡ ወክሉ ለጋር ደግመ እሉም። “እንተ ሐዞትክ ምን ማል አቡክ በዲር ሰበት ትናዘልክ ምኑ፡ አዜ ዲብ እሊ ማል እሊ ሐበት ሐቅመ አለብክ” ቤለዉ ወለማል ህዮም

ነሰአዉ።

ሓሪት ላሊመ እሉ መስል ሕልም ተሐለመ፡ ወለማል ክም ረከበዩ እንዴ ሀረሰዩ አስክ ሐዉ ጌሰ እቡ፡ ህዮምመ ለማል እንዴ ትከበተው ምኑ ክመ ቀዳሚቶም ቤለዉ።

ለጅነ እሱፍ እት እንቱ እብ ክልኤ እዴሁ ብራቀን ዐዱ ዔረ፡ ወክም ሰክበ እት ሐልሙ አቡሁ ረኣ፡ አቡሁ ህዩ ዲብለ ረዩሞም ለህሌት ገርህቶም እት ቀበት ከሌዕ ዎሮት ርዶል ካሪ ክም ዐለ አሰለዩ። ለጅነ እትለ ሐዉ እንዴ ጌሰ ከበርለ ርዶል ዶል ደግመ እሉም፡ እት ልተርጀን እቱ፡ “ ዎሮት ርዬላይ! እሊ ርዬላይ እሊ ላቱ ዶል ሐዜክ ጌሰ ኖሰከ ንሰኡ እግልክ” ቤለዉ።

ለንኡሾም አስክለ ገርህት እንዴ ጌሰ እግለ ርዶል ነሰአዩ፡ ወአስክ ዐድ እት ለዐቅብል እት ገበይ ዎሮት እናስ ድግለል ክልኤኦት ሐባይ ዓሰ እንዴ ረፍዐ ለልትዛብዩ ምኑ እት ለሐዜ ተሐት ወለዐል እት ለአንጎጌ እቦም ትከበትዩ። ህቱ ህዩ ቅርብ እንዴ ቤለዩ እሉም ክልኦት ዓሳክ እብ ከም ተአዘብዮም ህሌከ?” ትሰኣለዩ።

ለእናስ ድግለል ህዩ፡ “እምበል ዎሮት ርዶል ሐቴመ ይሐዜ ዲቦም” ቤለዩ። ለርዬላዩ ሀበዩ ወእግለ ክልኦት ዓሰ ነሰአ ምኑ። ከዐድ ክም ዔረ እግል እሲቱ እንዴ ሀበዮም ነብረ እግል ትውዴ እሉም ትረጃዩ። ለእሲት ሰኪነት እበ እግለ ኩብድለ ዓሰ ዶል ሰሞረተ ገሌ ለልኦንጨዋሬሕ ጋር ረኡት፡ ከምን አፍገረቱ ሐቴ ዐባይ ጀውሀረት እት እንተ ጸንሐተ። አዜመ እበ ሰኪነተ እግለ ካልኣይ ዓሰ ዶል ከምሀት፡ አዜመ አመተ አለበ ብዕደት ጀውሀረት እት ቀበትለ ዓሰ ረክበት።

እሊ ከበር እሊ ክሉ ለኣዳም ሰበት ሰምዐዩ እት ደጉሙ ክሉ ለምድር ክም በጽሐ፡ ለመልክ ከበርለ ጀዋህር ክም ሰምዐ፡ እግለ እናስ ትላከዩ ወለክልኤ ጀውሀረት እንዴ ነሰአ ምኑ እት አካነን የም አለቡ ማል ማጠዩ።

ረዶ አቡሁ ወአማነት ምስል ሐዉ ሰበት ዐለት እሉ፡ አመተ አለቡ ረቢ የም አለቡ አርዛቃት መነሐዩ ልትበህል።

እብ ክሱሰ እዲነ ለትበህለ

- “እለ እዲነ ብዞሕ እህታማም ለወጅበ እንዴ ገብኣት እግል ትትርኤካቱ፡ እሊ እንተ ትትሰሐቅ ወትትለወቅ ገብኣክ ምን ገብእ ቱ።” (ቻርሊ ቻብሊን)
- “ማይ ወሐዝ ክልኤ ዶል ኢንትሐጽብ እቱ” (ሀርቀሊስ)
- “ እዲነ ክመ እተ መዐፍየት ተ፡ ዶል ትሰሐቅክ እለ ለሐሰት ፍገሪት ትረክብ።” (መሰጠፊ ከማል)
- “ምስል እዲነ ቡቲክ ሰእየት ይህለ፡ ወምስል ቡቲክ ሰእየትመ እዲነ ይህሌት” (መሰጠፊ ከማል)
- “እዲነ እብ ዕን ዐልቀት፡ ብካይ ወጽርሓት ተ፡ ወእብ ዕን ወለት መትገፊራም ወመትሰፊጋይ ተ፡ ወእብ ዕን ድንግል ህዳይ ተ፡ ወእብ ዕን እሲት ተጅሪበት መክረህት ተ።” (ቡብሊልዮስ ሴሮስ)
- “እዲነ እምበል ሰእየት ለዘት አለቡ።” (ሀርቀሊስ)
- “እዲነ ሐጫር ተ፡ ምናተ ለመሳይብቱ ረዶም ለወድያህ።” (ዐረብ)
- እዲነ ሕልም ተ፡ ወእሊ ሕልም እሊ ሞት ተኣትሐሶሴነ ምኑ”(ፋርሰዩን)
- “እዲነ ሚተ ሐቆ ኢነአምር ሞት ህዩ ሚ ክም ተ እብ ከፎ እግል ነኣምራ ቱ።”(ኮንፊሾስ)
- “እዲነ ባቡር ገያድ ተ፡ ለእለ ተዐደ ሕልም ተ፡ ወታርፊት ምኑ ለህሌት ወሀም ተ።” (ተውፊቅ አልሐኪም)
- (ረጅብ ንበር ዐጅብ ትርኤ” (ዐረብ)
- “እዲናሁ እት ዐመል ኬር ለሓለፈዩ መብሩክ ቱ፡ ህቱ ዲብ ዐመል ሸር እግል ኢለሓልፈ ሰበት ተሐጭር እቱ ቱ።” (ኮንፊሾስ)
- “እዲነ ጀላቡ ለእንካፌሕ ጋር ሐቆ ሰኣነ ዲቤ፡ ተርጀመት አለበ” (ላማርቲን)
- “እዲነ ክመ እተ ምጽብዋ ተ፡ ከእበ እሳቱ እግል ንታክስ ብዲብነ አውመ ህዩ እንዴ አቅሰናሁ ዲብ ጽልመት ንንበር።” (ቆተ)
- (እዲነ ሰልሐት አለበ በዲረ ማይተት ተ” (ቆተ)
- እዲነ አስክ ደንጎህ እግል ትቅረኦ ለብዲብክ ርዋየት ግርም ሰበት ተ፡ ለለኦስፍክ ሰዋር ሳደፊክ ምን ገብእ ክሉ ረኣሰክ ኢትብጠር እቱ፡ ምን ኣመረ ለደንጎህ ግሩም ገብእ።” (መሐመድ አልሸዋፍ)

በህል

በህል

- ዎሮትመ ለፈቱክ ሐቆ ሰኣንኩ ነፍሰክ ኢትእቤ።
- ናይ ኖሰክ ረኣይ ወፈሀም ሐቆ አለብኩ፡ አረይ ረኣይ ብዕዳም፡ እግል ትግበእ ቱ።
- ብዕዳም እግል ተኣተንሴ ሰብር ለኣትሐዜኩ፡ ብዕዳም እግል ለኣተንሴክ ገብኣው ምን ገብእ ህዩ መውሀበት ተኣትሐዜኩ።
- ገሌሆም ውላድ ኣደሚ አክል-ሕድ ክመ እተ ቆሬዕ ቶም። ወሊ ዲብ ናይ ደሀብ ክርሲ ምን ተኣትገለዮም'መ፡ ብት እንዴ ቤለው ምኑ ክዲብለ ለቤዕ ልትለወሾ።

ለለኣትፈክር መዕሉማት

- ክልኢቶም እንክራት ገጽ ወድ ኣደሚ አሕድ ኢመሰሎ፡ ሐቴ ምነ ዕንታት ምነ መልሀዩ ሸበህ ተዐቤ፡ ወድማናይት እዘን እትለ በዝሐ ወቅት ምነ ድግለባይት ህተ ትትወቀል።
- እንቅሐት ሰገን ለዐቤት እንቅቅሐት ሰራይርተ፡ ህተ ምን ክትርመ ሰኒ ገዛፍተ 12 እናስ እግል ተኣጽግብ ትቀድር።
- ሐቴ ምዕል ምን አምዕሎታት ሰነት 1945 የም አለቡ ሰራይር እት ረኣሰለ እግል ደቃይቅ ለለሐሰብ አርቃም ሳዐት ቢግ ቤን ትጀመዐዩ፡ እብሊ ሰብ ለሳዐት እግል ሐምስ ደቂቀት ተኣከረት፡ ምናተ ሐር እግለ ጃሪ ለዐለ ዕዋል ተሰሊሕ ገብኦ እሉ።
- ምን ሚዛንክ ሐቴ ኪሎ ግራም እግል ተኣንቅስ ሐቆ ሐዜኩ፡ እንዴ ኢትበዋር እግል መሳፊት 34 ማይል እግል ተኣሲርር ብእትኩ።
- ዐቦት ጭፍርለ ምግባይት ጭብዕትነ ሰኒ ሻፍግ ቱ፡ ምናተ ጭፍርለ ሐባራቶ ጭብዕትነ ህዩ እብ ምልሃሁ በቅል።
- ዲብ መዲነት ሞምበይ እንዴ ገብኣክ ዶል ተኣሰተንፍሱ፡ ድዋርለ መዲነት ሰኒ ክሶሕ ሰበት ቱ፡ እት ሐቴ ምዕል አክል ክልኦት ባኩ ወሰር ምን ሰጃይር ለኣትነንክ ልትዐለብ።

ምን አምሳል ገባይል

- ትመጽእ ለህሌት ሰዕመት ትትፋቀድ፡ ወለሐልፈዩ ሰዓማት ትትረሰዐን። (ፈንለንድዩን)
- ለገብኦ ነፈር እግል ሕሽመቱ ህቱ ኖሱ ቱ ለሸቅዩ። (እንግሊዝ)
- ፎካሁ ምን ቀሽብ ላቱ ነፈር ክል ዶል እሳት እግል ኢትጽበዋ እቱ ፈርህ። (ፈረንሰዩን)

መዕሉመት

- እት አምዕል ሐቴ ሐበት ብርቱካን ዶል ንትናወል እት ገርብነ ለልትረከቦ ጀራሲም ወሚክርባት ምኖም እነጌ።

ጣዓሞ

እምበል ሸንሀት ለትወደዩ መእየስ ለገረማ ቱ.ሻም እምበል ቃሻሽ ለሐሳ ቱ..ወመሰንዮት እምበል መሰለሐት ለዐርያመ አለቡ።

ተበሰም

ክልኤ አቅሕሞተት እግል ዎሮት ሐርማዝ ምን ረኣዩ፡ “መህይ ነዐ ምስልነ ተልሄ የለ ሕድ ንትጋደል” ቢለህህ። ሐርማዝ ህዩ “እላቱነኡነ አዜ ምዶል ግሉል ዝበኡ ከዎሮት ዲብ ኣነ ምስልነን ክልኤ እትጋደል” ቢለን ልትበህል።

በህል እመራም

- ወድ ኣደሚ ሕጁብ ሰበት ገብኦ ኢትን ለእብ አሰፍ ወትዕስ ለልሸዐር.ህቱ እግል እሊ ጋር እሊ እግል ልትሐመሉ ዶል ኢቀድረ ሴጣ ቱ ለዲብ ክምእነ ልትካፊ።” (ምልቶን)
- “አዩ ግርመት ተ ገብኦ ዲብ እለ እዲነ እግል ግርመት እሲት ፊታይት ለትትዓደል።” (ላማርቲን)
- ወድ ኣደሚ ሕሚት ወሐምዴ አክል-ሕድ እንዴ ኢትካፊሊየሁ ክሉ ረኣሱ አክላቅ ታምም እግል ለህሌ እሉ ኢቀድር።” (ቃሽም አማን)



ዓዳት

ቀጩ ምጩር

ክል ምጅተመዕ ምስል ዓዳቱ ወሰዋል። ለገይሰ አግቡይ መንበረት ውበስር መልክ። ምጅተመዕ ትግሬው ክም ብዕድ ምጅተመዓት እዲን ምስል ዓዳቱ ወመንበረቱ ለገይሰ ብስር ምን ዘበን ቅዱም እንዴ አንበተ ምስሉ ልሄርር ነብረ። እብ ፍንቱይ እት ዘበን ቅዱም ምጅተመዕ ትግሬ እት ረዩም አካናት እንዴ ምን ሕድ ትራዩመ ነብር እቱ ለዐለ ወክድ። ምስል ደዐለዮት እብ ገበይ ዕልምየት ለዓለ አድውየት። ምን ዘበን ረዩም ወቅዱም እንዴ አንበተ ምን እት ድዋሩ ለልትረኩብ ፈርዖት ዕጩይ ክም ነብረ ወስራይ እግል ልትነፈሶ እብ ቃድር ዐለ። እሊ መልቀም እሊ ህዩ እት መንበረትሉ ምጅተመዕ አካን ዐባይ እንዴ ጸብጠ ምን ጂል እት ጂል እት ልትዐዴ ወልትወረሰ ሰበት ሄረረ። አስክ እለ ክብት እት እንቱ ነብር ለህለ ወእት መንፈሶት ለልትረኩብ ቱ። ምን ክም ነብረ ወስራይ እንዴ ገብአ ከድም ለጸንሐ መልቀም ከደን ገሌ ዶል እንርኢ ህዩ ቀጩምልሕጠ፣ሻሞት።



ቀጩ እት ዐዳገ መዲነት ከረን

ዐጋም፡ሐኪ፡ ልባን፡ ክስረ፡ ሕክን፡ ረኩብ፡ ደዐር፡ ዐካት፡ አመንኩር፡ ክዕን፡ ሻምጌ ውበዕድ እግል ንሰሜ እንቀድር። ገሌ ምን እሊ እብ ምጅተመዕ ትግሬ ክም ነብረ ወገሌህ ህዩ ክም ነብረ ወስራይ ልትነፍሶ እብ ለዐለው ቱ። ምን እሉም ላኪን ቀጩ ዶል እንገንሕ። እዴ ዛይደት ለብ መልቀም ከደን እት እንቱ እንረክብ። እግልሚ፡ ቀጩ ምስል እግል ሰራይ ለገብአ መልቀም ሰበት ገብአ። ለገብአት ጼወ እንዴ አክቡቱ እግል ረዩም ወክድ ጸኔሕ ባከ።

እም ክል-ዶል ረሐመት ቱ። ክምስልህ ምን ገኣት፡ ሰራይ

ለልትብህል መልቀም ከደን ምስል ጸንሕ እብ አሳስ እሊ እም ቀጩት ምን እት ሓብ እንዴ ከፊተ እግል ነብረ ወስራይ ለትአፈግር ምን ዕቅረቲታተ።

ቀጩ ምሌሕ ለቤለ ጽበዋ አሲድ ለመልክ ቱ። ምናተ ጠዐመትመ ቡ። እሊ ሰበት ገብአ ህዩ ለእት ቀላቅል ዐድነ ለልትረኩብ ምጅተመዕ ትግሬ እንዴ አረዩ እት ከብዱ ለህለ ፍሬ እንዴ አፍገረ ምን ምስል ክም ልትከምክም ወሽክል ክሉሊት ክም አክለት እንዴ ሀበዉ እብ አዱግ አውመ እብ እንሰ አስክ ዐዳጋታት እንዴ ጌሰው እብ ለአዘብዉ። ገሌህ ህዩ

እባህ ሽክል ወርሕ እንዴ ጸብሐ እብ ቀረፋ ወፍሬህ ልትዘቤ። አዳም ህዩ እግል ልብልዑ በህለት ልምጸጹ ወገሌህ እት ቤት ክም ሰራይ ወጽቤሕ እግል ልትነፈሶ እብ ልትዘብዩ ነብረ። ቀጩ ጽብሕ መሳኪን ቱ። መሳኪን መቅደረት ዶል ልስኣኖ ወልትገድፖ እንዴ አሸተረዉ ጸብሕዉ ወአከለቶም በልፖ እብ። እሊ ጽብሕ እሊ ምን እብ ጽብሕ ከብደ (ሽለል) ለትትበለዕ አከለት ለሕሰ ወለጠዐማቱ። እምበል እሊመ አዳም ሐምመ ምንገብእ ክም ቅርጩ(ወጀዕ ከብድ) ዶል ሳድፍ፡ የባስ ከብድ እግል አዋለሉት። መላርየት ዶል ጸብጡ ውበዕድ እግሉ ክም ሰራይ ልትነፈሕ ወልትሰቱ ቀጩ።

እምበል እሊመ ቀጠፍ ቀጩ ዘበን እብ ሰፍረ ሰዱ ሐልፈ ምንገብእ እንዴ ትበሽለ ልትበለዕ ነብረ። እት 40ታት ለልትረኩብ ግም ምን ወለዐል ለልትረኩብ እብ ክሰሰ ቀጩ ምን ንትሰአሎም ምን ናዮም ተጃርብ እግል ልዳግሞ እግልን ቀድሮ። እሊ ሰራይ እሊ ምስል እማት ለጸንሕ ክም ቱ ወአከደው እግልነ።

ምስል እሊ ዘበን እሊ መንፈሶት ቀጩ ክምስል በዲረ ምህመት እንዴ ትህየበት ልትሸቂ እበ ምንመ ይህለ። አስክ እለ እት

ረዩም ብሩር ለነብረ ዓይላት ወእብ ፍንቱይ እማት አዜመ ሽቅሊተን ኢትሐግሉ እግልሚ እብለ ሰራይ ወእብላመ ህዩ ታርፌ ቀዳምያት እማተን ሰበት ገብአ።


መዲነት ከረንመ እለ ምህመት እለ ምን ለአምረ መዳይን ዐድናተ። እት ዐዳገ መሓዝ ዕጩይ ክል አትኒን እማት ለፈርሻሁ ቀጩ እሊ ፍሬ እሊ ምህመቱ አስክ እለ ክም ህሌቱ ቱ ለልአርኤከ። እማት እግል እሊ ብዙሕ ስኒን ክም ሰራይ እንዴ ገብአ አስክ ዐባት ለአቀደመየን ፈርዖት ወመልቀም ከደን እግል ልትረስዓሁ ወቅርዱ እግል ልንቀል ኢሰምሐየ እግሉ። አስክ እሊ ዘበን ጥዉር እንዴ ረፍዐሁ ሂሩራት ሰበት ህለየ ለሽቅል እግሉ አዜ ለህለ ዳርሰ ግም ለተርፍ ቱ። ጽበጡ እንዴ ትደለ ክም ሰራይ ወነብረ እግል ንትነፈሶ እብ ለዐቤት መስኡልየቱ ቱ። እማት ምስልን እንዴ ትዳግም ዐልከ ለህግያከ ናይ ሐሰድ ውበዕድ እኩይ ፋል መሰለ እተን ምንገብእ “ቀጩ ምጩር” ልብላከ። እሊ ለልአተብለን ህዩ ሽርከ ልክለአኑ። ቅጽጽ ምንእኑ። ረቢ ለእንተ ትብለ ለህሌከ ኢልአርኤከ ውበዕድ ለተአሰምዕ ቱ። እሊ ህዩ ቀጩ ምን ሐሰድ ወሕማም ዕንመ ክም ነፍዕ ለሐብራከ ህለየ እበ ፈሀመን።

ልባሰ፡ ግርመት ወጅንሰየት ምጅተመዕ ሽሬሕ

ክል ምጅተመዕ እብ ለልትሌሌ ዓዳት ቡ። ልባሰ ህዩ ምርት ምን መፈረጊሁ ቱ። እሊ ልባሰ እሊ ህዩ ክም ቆምየት ወምጅተመዕ ለህይከ ምን ለህይ ለልትፈንቱ ወልትአመር ወድዩ። እት ቆምየት ትግሬ እንዴ አቅበልን እግል አንሰ ወተብዐት ለልትዳሌ ልባሰ ምስል ዕምር ለገይሰ ግርመት ወደረጀትሉ ምጅተመዕ ለልሐብር ቱ። ጅነ ቀሚሽ ወስርዋን፣ሻብ ቀሚሽ፡ ጅዋኒ፡ ሰርዋን ወመሰደረት፡ እናሰ ታምም ህዩ ቀሚሽ፡ጅዋኒ፡ ሰርዋን መሰደረት፡ግግየት ዕመት ወሰማዲት ወዴ ወልትገራረም፡ እሊ ህዩ ዕምር፡ ዓደት ወሕሽመትሉ ምጅተመዕ ወሽመቱመ ሽሬሕ።

እብ እንክር አንሳትመ ርኤነ ምንገብእ፡ እግል ወለት ንኢሽ ቀሚሽ፡ ዐባይመ እት ዘበን ቅዱም መዐንደቂት ወዙቲ እት መዳይን ላኪን እስኬርቲ፡ ብለዘት ወመገልበብ፡ መርዒ ወእማት ህዩ ውሽጢ፡ቀሚሽ፡ ጠርሐት ውበላይ ገሌ ምን ልትለበስ ለጸንሓቱ።

እትሊ ዘበን እሊ ላኪን እሊ ልባሰ እሊ እት መናሰባት ሕዱድ ክም ከረ ዮም ጅምዐት ወዓያድ እትኢኮን ክል አምዕል ልትለበስ ይህለ። ወለት ወሕጸን መናጥሊን ወምስሉ ለገይሰ ልባሰ እንዴ ለብሰው እት ብሩር ወመዳይን እመር እድንያሆም ሳይሮ ልትረከቡ። እሊ ልባሰ እሊ ላኪን ዓዳትን ወሰሚትን ለሽርብ እት እንቱ ልትርኢ ለህላቱ። እግልሚ፡



እሊ ልባሰ እሊ ምን አሮብዩን ለመጸ ሰበት ገብአ ምጅተመዕን ለልትሌለው እብ ግሩም ልባሱ እንዴ ሰልበ ወአብደ ሽባብ ወሻቦት ምን ገበዮም ወዓዳቶም ክም ለአወልጦ ዋዲሆም ህለ። ለሰብ ለትፈናተ ምንመ ገብእ፡ እብ አዋልድ ለልትህየብ ሰብ እብ ገበይ ዓዳት እግል ልትከበት ምንን ለኢቀድር መሰምስ ወሀበየ እቱ ዐለየ።

እብ ውላድ ላኪን ምስል ሽቅል ወሐረከት ብዝሕት ውጡይ ኢኮን። አጊድ ረስሕ ውበዕድ መሰምስ ሰበት ለአመጽኦ እግል መከምከም ወሽቅል መናጥሊን ክም ለብሶ ወለምዶ ለአፍህሞ። እምበል እሊመ ምስል ዘበን ለመጸ ልባሰ ሰበት ገብአ ላዝምቱ እንተ ወድ ዘበን ሰበት ገብአከ ምስል

ዘበን ለገይሰ ልባሰ እግል ትልበስ ህለ እግልከ። ምን ልብል ፍክር እንዴ ትበገሰው ወለት ልግበእ ወሕጸን መናጥሊን ወፍሌንያቱ ሳዶ እቶም ከልትብገሶ። እሊ ነፈር እሊ እምበል ናይ ዓዳት ወሻክል እብ ዕን ዓፍየትመ እት ለትፈናተ ወሳይል እዕላም ክምስለ ልትሐበር፡ እት ዓፍየት መደረት ለሰብ ቱ። ልባሰ ሰዱድ እግል ገርብ ሰበት ራሐት ከልኡ ድቁማት ነፍሰ ወጸልዕ እግል ልሰብብ እቱ ቀድር ልብሎ። ከአዜ ሚ እግል ኒዴ ብን ገብእ? ምስል ዘበን እግል ኒጊሱቱ እንዴ እንቤ እብ ፍንቱይ አንሳት ምን ዓዳትን ወሕሽመትን ለልአክድ ልባሰ ዓዳትን ወጅንሰየትን እንዴ አወለጠየ እት መናጥሊን ሐሽክል እግል ልግበእ በን መኢፋለን? ምርት መልህዬ እግል ሐቱ ክልኦት እንዴ ወልደት ባጥረት ለዐለት መርዓት እግሉ ለቤለየ ሂገ አዘከሬኒ እሊ ሰኣላት፡ ለመርዓት አጀኒተ ሰርሓም እግሉ ዐለው፡ ዓማርም ዝያድ 4 ሰነት ገብእ፡ ህተ ውበእስ ህዩ ሽቃለ ሕኩመት ቶም።

ለመልህዬ እት ልሀራጅጅ ምስሉ፡ “መልህዬ ሚ ቱ አፎ እሉም አጀኒትኩም ኢትወስኮ እቶም” ክም ቤለየ፡ ወላሂ መልህዬካቱ እሊ ሰኣል እሊ እግሉ ከሰስ እግሉ በሉ ቱለቱ፡ ዲብ ትተልሂ ምስሉ። ህቱመ ይአዝመ ምን። “መልህዬ አማኑ ቱ ህቱመ እንቲመ ትቀየርኪ ምስሉ

መናጥሊን እንዴ ለበሰኪ ሐቆ እት ሽቅል ላሊ ወአምዕል ሄረርኪ ገርብኪ በርሰስ ወምን መሻዕርለ እሊት እግል እናሰ ተሀይቡ ፈገርኪ ከእናሰ እናሰ መሰሊ እቱ ሰበት ህሌኪ እበየ እግል ልስኩብ ምስልኪ ተሐዘ ህሌኪ?” እንዴ ቤለየ አትሰሐቀየ፡ ከእለ ሂጋሁ እብ ምር እንክረ ናይ ሀራጃጅ ምንማተ፡ እበ ብዕድ እንክር ህዩ አማን ቱ። ለአማን አንሳይት ልባሰ አንሳይት እንዴ ለብሰት ገርብ እግል እናሰ ለልሰሕብ ግሩም ኢገብአ ምንገብእ፡ ላመ እናሰ መሻግ ምን፡ ሰበት እሊ በደል መንጠሉን ለወዴት አንሳይት ልባሰ እማተ ወአቦታተ እንዴ ለብሰት ከነን ለትብል እግልካተ መ ሻ ዕ ር ከ ለትሰሕብ እሊመ ገሌ ምን እኩይ ክፈሉ እግል ልግበእ ቀድር።

ለ ዋ ጅ ብ ላኪን ልባሰ እናሰ ልግበእ ወ ተ ብ ዐ ት ምስል ተጠውር ወ ብ ዕ ድ አሰባብ እት ነኣትሳንዩ ጊሰን እብ ምንገብእ እብለ ዓዳትን ወእብላመ እት ሽቅል ውበዕድ መ ና ሰ ባ ት

ውጡይ ለገብአ ልባሰ እንዴ አትዳሌን እግል ንትሰሚ እብ እንቀድር፡ ሰበት እሊ ልባሰና ዓዳትን ወጅንሰየትን ሰበት ገብአ በደል እት መናሰበት ሕዱድ ሌጠ ንትነፈሶ እብ እብ ገበይ ጥውርት እንዴ አትዳሌናሁ ምን ንትነፈሶ እብ ምህም ቱ። እብ ፍንቱይ አንሳት ግርመተን እብ ልባሰ ዓዳትን ክም ገርም እንዴ ኣመረየ ዕንተን እቱ እግል ልክረየ በን። እለን እትሊ ክቱብ እሊ ለህለ ሰወር ህዩ እሊ ፍክር እሊ ለሰንድ ቱ። ለሻቦት ወለመርዓት እብለ ልባሰ እሊ ዝያድ ግርመተን ወጀላለን ትትርኢ። እሊ ህዩ ዝያደት ብዕዳት ክም ልትፈተየ ወልትሐሽመ ወድየን።



ፌሪቅ በሐር ቀየሕ ሻምፕዮን ኩረት እግር አቅሊም ምግብ ገብአ

እግል አውርሐት ልትገባለህ
ለዐለ ጅግረ ሻምጥኖን ከረት
እግር ዲቭዝኖን ኤ ሰነት ርያደት
2017/2018 ለሐልፈት ሰንበት
ዐባይ እት ስታድዩም አስመረ
ተምመ። ምን ጽባብሐት ሻምጥኖን
ክም ገብእ እኩድ ለዐለ ፈሪቅ
በሐር ቀየሕ እት አምዕል ለሀ
እግል ፈሪቅ አዱሊስ 2 እብ1
እንዴ ቀልበ ናይ ኢመትቀላብ
ሰሜቱ እንዴ ወቀለ ካስ ረፍዐ።
ለእግል 18 ሳምንቱ ለአተላለ
ጅግረ እት ካቲማሁ ለሐድረው
መስራሊን ርያደት ወፊታች

አቶሐየሱ።

ለእት ፍንጌ ፍረቅ ገዝባንደ ወደንደን ለዐለ ጅግረ እተ ናይ ሰልፍ 45 ደቂቀት እምበል ጎል ተምም እት ህለ እት 51 ደቂቀትለ ትልህየ ፈሪቅ ደንደን ጎል ሰበት ኣተ ትልህየ እግል ልምረሐ ቃድር ዐለ። መተልህየት ፈሪቅ ገዝ-ባንደ እግል እለ. ጎል እለ. ልብለሶ ብዙሕ ምንመ ጀረበው. እግል ልትዐውቶ ኢቀድረው፡ እብ ድዱ ፈሪቅ ደንደን ኣዜመ እት 89 ደቂቀትለ ትልህየ ጎል ሰበት ኣተ ሜርሒቱ እት 2 እብ 0 ወቀለየ። እት ኣክር

እት ፍንጌ ፍረቅ በሐር ቀየሕ ወኡዱሊስ ለጉበአ ጅግረ እግል ክልኢቱ ለፍረቅ ለልኣትሐዜ ሰበት ዐለ፡ ትልህዩ ምን ጽባብሐ ጀርባታት ለበዝሐ እት ዐለት። ለኣተ ጎል ሰበት ይዐለ ትልህዩ እብ ናይ ሕበር ዐውቴ እግል ዕርፍ ትፈንተው ምን። ግረ ዕርፍ ለተላለ 2ይ ክፋለ ትልህዩ ሀዳፍ ፈሪቅ በሐር ቀየሕ ላቱ ሻም ፍላሃዬ እግል ፈሪቁ በሐር ቀየሕ ሜርሒት ለልኣጸብዋ ጎል ወእግሉ ህዬ ብዝሐኡ ኣግዋሉ እት 15 ጎል ለወቀለ ዐለ። እሊ እት 53 ደቂቀትለ ትልህዩ ዐለ፡ ግሪሁ እት ናይ 8 ደቂቀት ፈርግ እት 61 ደቂቀት ፈሪቅ ኡዱሊስ እግል ልትዓደል ለሰደዩ ጎል ሰጀለ። እሊ ጎል እሊ ህዬ እብ ተመስገን ክብርም ለትረከበ ዐለ።

ትልሆ የኦብላህ እት ትተላሌ መተልህያይ ፈሪቅ በሐር ቀየሕ እብ ከርት ቀይሕ ሰበት ፈግረ ፈሪቅ በሐር ቀየሕ እብ 10 መተልህያይ ፈሪቅ አዱሊስ እግል ልጋቢሆ ድቂግት ነፍስ ዋዲ እቶም ዐለ። ለላላት ክእነ እት እንተ ሀዳዩ ፈሪቅ በሐር ቀየሕ ሻም እት 69 ደቂቀት ጎል ሰበት ሰጀለ ፈሪቅ በሐር ቀየሕ አርወሐት ትዘረአት እቶም ወእግል ልቅለቦ ሒለት ለብሰው።

እብላ ፍገራት እለ ህዬ 2



ርያደት እተ ሓድረወ መናሰበት
አሰልፍ ጅግራሁ ወዳ ለዐለ ፍረቅ
ደንደን ወገዘጥንደ ዐለው፥ ፈሪቅ
ደንደን ሰበት ተዐወተ ህዬ ደረጀቱ

ለአተ ጎል ሰበት ይዐለ ፈሪቅ ደንደን
ሰለሰ ንቅጡት እንዴ ረከበ ደረጀቱ
ለአተሓይዞ እት ህለ ፈሪቅ፡ ዝበንደ
ህዩ እት 2ይ ዲሺዝዮን ትከረ።



እብ 1 እንዴ ቀልበ ፈሪቅ በሐር ቀየሕ ካስ ነስእ እት ህለ ፈሪቅ አዱሊስ ለበለ እት 2ይት ደረጀት እብ ፈሪቅ ደንደን እብ አግጥል እንዴ ትቀደመ ትትነስእ ምኑ እት ህሉት፡ ፈሪቅ በሐር ቀየሕ እብ 48 ንቅጠት 1ይ ፈግረ ወካስ ምን እዴ ሓክም አቅሊም ምግብ ትሰለመ።

ፈሪቅ በሐር ቀየሕ መዳልያት ካስ ዐባይ ወ20,000 ነቅፈ ነስእ እት ህለ ፡ ፈሪቅ ደንደን 2ይት ደረጀት ሰበት ጽብጠ እብ 42 ንቅጠት መዳልያት ፍደት ወ15 አልፍ ነቅፈ ነስአ።

3ይት ደረጃት ለጽብጠ
ፈሪቅ አዱሊስ 10 አልፍ ነቅፈ
ወመዳልያት ንሐስ ትከብተ። እብ
16 ጎል ለሐስ ሀዳፍ ለጅግረ
ጉበአ ሻም ፍሰሃዬ ካስ ወ15

አልፋ ነቅፈ ልትሆብ እት ሀለ፡ እብ ዓመት እት ሻምፕዮን ኩረት እግር አቅሊም ምግብ ሰነት 2017/2018 ሱፐር ዲቭዝዮን ኤ ኢንተርናሽናል ሕካም ተክሊ ሞገስቶናስ ዘካርያስ ወሴድያይ እድንያይ ዳንዩ ሚካኤል በረከት ወሴድያይ ፈደራል ዳዥ ሲራክ ሳምኤል ክል ምኖም ካስ ወ1500 ነቅፈ ተሆብወ። እትሊ ጅግረ እሊ ፈሪቅ አዱሊስ ናይ አደብ ካስ ነሰእ እት ሀለ፡ እትሊ ዮም ዓመት ለጉበአ ጅግረ ሻምፕዮን ኩረት እግር አቅሊም ምግብ ገሌ አከይ-አደብ እት መተልሆት ሰበት ትረአ ዲቡ ምን ጽባብሐ ለትክሰስ ጀህት እግል ትሰይሐ ክም ወጅብ ምን ገሌ ፈተች ርያደት ለመጸት ሐብሬ ተአናህም።

ካሚሩን ምን መቶሐዳር ካሰ አፍሪቀ 2019 ትቶሐከክ

እት ቃረት አፍሪቀ ክም ምህም
ሐድሰ ኩረት እግር ለልትርኤ እት
ክል ክልኤ ሰነት ለጉበኢ ጅግራታት
ኩረት እግር ድወል አፍሪቃቱ።
እት ሰነት 2019 ካሜሩ እግል
ትትሐደሩ መስኡልየት ራፍዐት
እግሉ ለዐለት ካስ አፍሪቀ፡ ካሜሩን
እሊ ምህም ሐደስ እሊ እግል ተኣዳሌ
ኢቀድረት ምንጉበኢ፡ ለበክት እግል
ሞሮኮ እግል ልትከሰትቱ። እሊ
ልትበሀል ለህለ ለዐድ እት ኣክር
ደቃይቅለ ጅግረ ቀደም አንባቱ እት
ትትሓከክ ትትርኤ ሰበት ህሌት ቱ።
እሊ ልትበሀል ለህለ ወሳይል እፅላም
አፍሪቀ ካሜሩን እት ቀደም ለህለ
ተሐዲ ማልየት ወመዳላይ ቱክኒክ
ምስለ ቀደም ክልኤ ሰነት እግል
ኡዳላይ ካስ አፍሪቀ ሰነት 2019
እት ወክዱ እግል ተኣትምሎ ሰበት
ኢቀድረት ወወክድ ዲበ ተምመ
ኢነትቱ።

ካሜሩን እቶ ካሰ አፍሪቃ

ለሻርከ ድወል 24 ደውለት እት ገብሏ፡ ለትመጽእ ሰነት 2019 እት ከረም ወእብ ፍንቲይ ህይ ምን 7-30 ጁላይ እግል ልግበእ ቲ። እተ ሐልፈ. ወክድ መሰኡል ካፍ ላቲ አሕመድ አሕመድ ካሚሩን ካሰ አፍሪቀ ሰነት 2019 እግል ትትሐደር ከም ቲ እኩድ ዐለ።

ምናተ ካሚሩን ለአርኢቱ መትኦካር እተ ተሐደደ ወክድ እግል ልትመም ለወጅቡ ሚዳናት ወናይ መዳላይ አካናት ክምሰለ ትበህለ ሰበት ኢትዳለ፡ እግል እለ ጋሪት እለ ለታብሰ ለጅነት ቴክኒክ እብ ካፍ አሰክ ካሚሩን እንዴ ጌሰት ለሓላት እግል ትድሌ እተ መጽእ ለህለ ወሬሕ ኦክቶበር እግል ቲጊስ ክም ቱ ልትሸረህ ህለ። እለ ለጅነት እለ ለሓላት እንዴ ርኡት ለትህይቡ ተቀሪር እቱ እንዴ ተንክበ ካፍ ካሰ አፍሪቀ ሰነት 2019 እት ካሚሩን አውመ እት ደውሉት ብዕደት እግል

ትግበራ እግል ልቀርር ቲ።

ካሜራን ለእግል ትብኩምም ምስል ካፍ እት መፋህመት ባጽሐት እቲ ለዐለት ሰለሰ ዐባዩ ስታድዩማት እግል ትብኩዩ ቃድረት ይህሉት። እሊ ለገብአ እቡ ሰብብ ሽቃላለ እስታድዩማት ክል-ዶል ግርፈ(እድራብ) ሽቅል ወዱ ሰበት ህለው። እሊ ወዱ እቡ ለህለው ሰብብ ማህያቶም እንዴ ኢነስኦ አውርሐት ብዞት ሰበት ጸንሐ ምናም ቲ።

እምበል እሊመ ካሜሩን እግል እሊታድዊማት እት ወርሕ ዲሰምበር እግል ተአትምሙ ከትሰልሙ መፋህመት ባጽሐት ምንመ ዐለት፡ ዮም ዓመት መሻርከት ካሰ አፍሪቀ ምን 16 ፊሪቅ እት 24 ፊሪቅ ሰበት ትወቀለ እግል እብ ሕግላን ውበዕድ መሻክል ሲያሰት ትትዐዘብ ለህሉት ካሜሩን ምን ቅድረተ ወልዐል ጋብእ እተ ህለ ለካድም፡ ለልጅነት እትሊ አውርሐት ቅሩብ ሓለት ዐረዮት



መዳላይ ካሜሩን እግል ካስ አፍሪቀ ሰነት 2019 እት እሻረት ሰኣል ኦቴት ምንገብእ ካፍ እብ ናይ ኖሱ መዛደረት እት ብዕደት ደውለት አፍሪቀ እግል ልትዳሌ አዋምር እግል ልሓልፍ ቲ፡ እሊ ወክድ እሊ ለእብ ምራድ ኖሰ እግል መትሐዳር ካስ አፍሪቀ ጠልብ ለዐለት ሞርኮ

**እግል ተኡዳዩ በክት ዐቢ ክም በ
ልትሸረሕ ህለ።**

ጥሮኩ ቀደም እለ ካሰ ዐለም
2026 እግል አዳላዮት እተ ገብአ
ጅግረ እብ ድወል ላቲን አሜሪካ
ክም ከረ ሜክሲኮ፡ ከነደ ወአሜሪካ
ክም ቀለበት ለልትአማር ቱ።

ቢ.ጊ.ያም ግርማይ እት መርከዝ ተክሂል ዩ.ሲ.ኣይ

እት መርከዝ ተኣሂል ዐጀላት፡ መሕበር ዐጀላት ዐለም (UCI) ተኣሂል ነሰእ ለህለ መትባድራይ ዐጀላት ቢንያም ግርማይ እት ጠወሮት መቅደሪቱ ዐቦት ለእርኤ ክምህለ እተ ገብእ ጅግራታት ናሌንዮተለ ፈሪቅ እንዴ ለብሰ ዲብለ ሻረከ እቲ ለሰጀለዩ ዐውቴታት እቡ እኩድ ህለ።

ቢያም ኢት ሐልፈት ሰነት

ምን መትጃግረት ሸባብ 1ይ
 ፋግር ክም ዐለ ለልትአመር እት
 ገብእ፡ ለሐልፊት ሳምን እተ ገብአ
 ጅግረ ቤልጁም ወሰለለ መርሐት
 ለከምከመ ጅግረ እቱ እተ
 ሰልፋይት መርሐለት ልትዐወት
 እተ እት ህለ፡ እተ ሳልሳይት
 መርሐለት ሳኪን ሱሳይ ፈግረ።

እብ ዕመማይ እተ ገብኡት ሰለስ መርሐላትላ ጅግረ 3ይ ፈግር እት

ሀላ፡ ምን እተ ጅግረ ለትዐወተ መትብድራይ እብ 4 ደቂቀት ወ8 ካልኢት እንዴ ተአከራቱ እለ ደረጀት እለ ለረክበ። እብ ንቃዋመ መትብድራይ ዐጀላት ላቱ ግርማይ እብ 33 ንቅጠት 4ይት ደረጀት ወእት ሐየት ሰጋደት ለገብአ መትብዳርመ እብ ሕድ ለሸብህ ንቃዋ 4ይት ደረጀት እንዴ ጸብጠ ጅግራሁ እትሙም ሀላ።






ሐዳይ እብ ክሱስ ኒል፡ ከዛን አሰዋን፡ ብሔረት ናሰር ወዳልተ ኒል



ነሀር ኒል፡
ነሀር ኒል ምን ብሔረት ሺክቶርያ ለልትብገስ ኒል ጸዕደ ወምን ብሔረት ጣነ ናይ ኦቶብዩ ለልትብገስ ኒል አልአዝረቅ እንዴ ትበሀለ ዲብ አትበረ ሱዳን ህዩ ነሀር አትበረ እንዴ ትወሰክ እቲ አስክ መሰር ሄራሩ ለአተላላ።
ነሀር ኒል 95 ምን ምእት ናይ ሸዑብ መሰር እት ግንራሪቡ ነብር። ለበዝሐ ምኑ ህዩ እት እት ግንራሪብ ኒል ለህለዩ መዳይን ዐባዩ ክምሰል ከረ ካይሮ ወለክሳንደርያ ውበዕድ መዳይን ለነብር። እብሊቲ ህዩ ኒል አርወሐ መሰርዩን እንዴ ትበሀለ ለልትወሰ።
መሰርዩን ምን ምን እሊ ነሀር እሊ ለረከቡ መናፍዕ ክምሰለ እት ለዐል ለተህደገ ምንማቲ። ዝያደት ላኪን እግለ ሰሕረ ላተ መሰር እት እት ጀነት ለበድል፡ እተይ ሐርስ ለትጃቅፍ ምኑ ሰበት ገብኡ፡ እሊ እግል መሰርዩን እበኣማንመ አርወሐቶምቲ ምን ልትበሀል ምን ኣማን ለፊመ ኢትን። እብ ፈድል እሊ ነሀር እሊ ህዩ ለምን ክል ኣካን እንዴ ሐጽብ ለጌልለ ርሸድት ትርበት እትሊ ምድር እሊ ሰበት ለሐድረ፡ መሰርዩን እንዴ ሐርሰው

እተይ ሰኒ ወሳፊ ለኣቲ። እብሊቲ ህዩ ምን ዘመን ቅዱም እንዴ አስተብደው እት አዋራፍ ነሀር ኒል ለትፈናተ ወእብ ፍንቲይ ክምሰል ሸንራይ፡ እንጣዋዕ ወፔፕሪስ ለልትበሀል እት ዘበን በዲር ውላድ መሰር ወረቀት ሸቁ ምኑ ለዐለው ተክል ለአፈሩ ዐለው።
ምን እት ግንራሪብ ነሀር ኒል ለህለ ብዕድ ከዛናት ረኡነ ምንገብኡ።
ከረ ከዛን ሮዘርስ፡ ከዛን ሲናር፡ ከዛን አሰዋን፡ ከዛን ያዩን ገብኡ እት ህሉ፡ ነሀር ኒል እት ክል ምዕል ሐድ 300 ሚልዮን ምትር መክዑብ ለውሕዝ።

ከዛን አሰዋን፡



ክምሰሁመ ሐድ ምኑ እግል ሱዳን ለነፌዕቲ። መዳይን ወቀወሺ መሰር ማይ ሲቶ ካፊ ክምሰል ረክብ ወደ። ዓሳታት እግል ጀለቦት ሰደ። ነሀር ናይል ምን ተርቅ ክምሰል ልትህወን ገብኡ። እሊ ህዩ እት ግንራሪብ ናይል ለህለ መዳይን ዝያደን ደሐን ምን ተርቅ ለህይብ። ዓማት ጣቀት ከህረበት ገብኡ። እሊ ህዩ እግል መሳኔዕ ልግበኡ ወእግል መብረህት ውበዕድ ወራታት ሰደ። ለከዛን እት ክል ሰነት ከምን መርግ ሰበት ልትመለእ እሊ መርግ እሊ ክምሰል ሸፍር እንዴ ገብኡ እት መንፈዕት ሐርስ ልውዕል ወእብ ፈድሉ እተይ ሰኒ ልትረከብ።ማይለ ነሀር እብ እሙር ቅያስ ሰበት ገይሰ ሰነት እብ ግዲደ ጅላብ እግል ልትሐረክ ዲቡ ሰዴ።

ብሔረት ናሰር፡

እሊ ብሔረት እሊ ክምሰል ፍገሪት አው ነቲጀት ብነ ከዛን



አሰዋን (አሰድ አልዓሊ) በህለት እሊ ሰድ እሊ ምን ሰነት 1958 አስክ ሰነት 1970 ክምሰል ትሸቀ ለትወለደት ብሔረት ተ። ለብሔረት እብ ሰሜት ጀማል ዐብደናሰር ትሰሚ እት ህሉት ጀማል እት ወክድ ለህይ በህለት ምን ሰነት 1952 እንዴ አንበተ ሚርሓይ ሰውረት መሰር ለገብኡ

ክምሰሁመ ካልኣይ ርኢስ መሰር ለዐላ ቲ። ጀማል ዐብደናሰርቲ ህዩ እሊ መሸሮዕ ብነ ሰድ ዓሊ ለኣትብገስ።

ብሔረት ናሰር አው ሰድ ዓሊ 132 ኪሎሜተር መክዑብ ማይ ጽብዋ እት ህሉ፡ እሊ ብሔረት እሊ ለትገልብብ ርኡብ ህዩ 5250 ኪሎሜተር መረበዕ ቲ። መጀርብ አው እትሊ ብሔረት እሊ ማዩን ለጀሌሕ ድወል ህዩ መሰር ወሱዳን ተን። ቁሪነ ናይ እሊ ብሔረት እሊ 25.2 ምትር ሰበት በጽሕ እግል ሐረክት ጀላብቭ አው በዋቢር በሐር ውጤት ተ።


ዳልተ ኒል፡

ነሀር ኒል በህለት ኒል አልአዝረቅ ወኒል አል አብደድ ዲብ ዓሊመት ሱዳን ላተ ከርቲም ዲብ ሕድ ልትሓበር እት ህሊ ዲብ መሰር ህዩ ምን ሐዲስ ዲብ ክልኤ ልትከፈል። እሊ እት መፈንተይ ናይል ክልኡት ነሀር ለህሉት መሰለስ ርክን ለበ

10 ለነአሸዩ ድወል እዲነ ተአሙረን ማሚ፡

ደውለት ሊቸተንስተይን
(Liechtenstein)
ደውለት ሊቸተንስተይን (Liechtenstein) ህግዩ ጀርመን ለትትሃጌ ደውለት እት ገብኡ፡ ዲብ ዐለም ለሐቲ ደውለት እብ ተማመ እብ አድብር ለትከለለት ተ። ደውለት ሊቸተንስተይን (Liechtenstein) ፍንጌ ድወል ሰዊዘርላንድ ወአውሰትርያ ህሉት።ሊቸተንስተይን ለጸግበት ደውለት እት ዐለምተ። እምበል እሊመ ለሐደ ሕግላን ሸቅል ብኡተ። እሊ ደውለት እሊ ምሰል ግዋሬህ ለለኣትራክበ መከረዩ ዋያራት አለበ። ክሉም አስክ ለገደሶ ቤጽሐት እብ ገበይ

መከረዩ ዋያራት ዙሪኽ ሰዊዘርላንድ እንዴ ወደውቶም ለገደሶ ወበጸሐ። ደውለት ሊቸተንስተይን እብ አሚር ትትመቀረሕ። እሊ ደውለት እሊ 55651 ሸዑብ ለህለ እሊ እት ገብኡ፡ ፍይሔ ምድረ 160 ኪሎሜተር መረበዕ ቲ። እሊ ደውለት እሊ እት ዐለም እብ ንእሽ ሱሳይት ደረጀት ትጽብዮ።
እተ ትመጽእ ዋብዐት ጀሪደት ኤረትርያ ሐዳስ እብ ሰበትሊ እት ዐለም እብ ንእሽህህ ሓምሳይ ደረጀት ለትጽብዮ ደውለት ሳን ማሪኖ እግል ንርኤቲ አስኩ እት ደሐን ጽንሐ።



ርክን ሰወር

እሊ “ርክን ሰወር” እብ ልብል አርእስ ምን ኢንተርኔት ውበዕድ ወሳይቅ ታሪክ እንዴ ሐናፊልነ ለረከብህሁ ሰወር እት ገብኡ፡ ሕነ ማሌ ሚ እመሰል ዐልነ? ልባሰነ፡ መናበረትነ፡ መጽዐንነ፡ ተዋብነ፡ ጽዋርነ ወራታትነ፡ ክምሰልሁመ ምድርነ ውበዕድ ለሸፊሕ ሰወር ዎርት ምን ሕራብ ዓሙድ ነፊት አምርቲ። እሊ ሰወር እሊ ለበዝሐ ምኑ እት ዘበን ዋልያን ለትሰወረ እት ገብኡ፡ ሐድ ምእት ሰነት ወዐረዲሁ ግረ ለበልስ ቲ። ከእግል ዮም እሊ ትርኡው ለህሉኩም ሱረት ዕፈው ወእብ ዕንኩም ለዘተ አዳውር።



እሊ ሱረት እሊ እት ሰነት 1920 ለትሰወረት ናይ ሐቲ ፍርቀት ዓዳት ትግሬ እት ገብኡ። እሊ ፍርቀት እሊ ምን ሳሕል ሐባብ ተ። ኣላት ሙሲቀተ ህዩ ክመ ትርእዉ ለህሉኩም ክልኡት ዕንድር ወመሰንቆ ቲ። ድሺዘት ናይል ፍርቀትመ ዕፈው በለሊት ሰባኒ ውኑዝፍት ህሉት። እሊ ሱረት እሊ እት ዓሙድ መዐፍየት ለህሉት ሱረት ተ።